

B. N. C.
FRENZE
831
30



RESPONSUM

AD

QUÆSITUM

ACADEMIÆ

BRUXELLENSIS.

PRÆMIUM ANNI 1785.

REVERENDI DOMINI
CORNELII SMET,
PRESBYTERI,
RESPONSUM
AD QUÆSITUM,

Quo jure Hermannus, maritus Comitissæ Richildis, Comes Hannoniæ fuerit, suæne an jure uxoris?

Cui palmam detulit Cæsarea Regiaque Bruxellensis
Academia, anno 1785.

Nullo discrimine sexûs

Fert Dominos Hainoa suos



BRUXELLIS,
TYPIS REGIÆ ACADEMIÆ.

— — — — —
M. DCC. LXXXV.



PROLOGUS.

QUÆSTIONEM hanc uti nec solutu facili, sic illustrandæ Historiæ Belgicæ perquam utilem esse censebunt, quicumque animum vel leviter advertèrint. Medio sæculo undecimo Hanonienſium Comitiffa, ut vocant, Richildis Hermannò nupta fuit, quem *Hermannum Montis, qui Caſtrorum locus dicitur, Comitem* nuncupat Anſelmus (a) Canonicus Leodiensis, his conjugibus æqualis auctor. Quin adeò si coævum itidem ſcriptoris, poſtea pluribus memorandi, Lamberti Schafnaburgensis verbis ſtare liceat, Comitatum Richildis *dotis nomine* ab Hermannò acceperat : si Gisleberto Chroniæ Hannonienſis auctori præclaro fides eſt, Hermannus *poſt quàm plures Comites Comitatum Hanonienſem jure hereditario poſſedit*, poſtque ejus obitum Richildis *totam terram Hanonienſis Comitatus tam de jure dotalicii, quàm de procuratione puerorum ſuorum tenuit*. Hanc viduam uxorem duxit Balduinus VI Balduini V, cui *Inſulani* nomen fuit, Flandriæ comitis filius, qui *proin utrumque Comitatum tenebat, Flandrenſem per patrem, Hainonenſem per Richildem*, uti loquitur An-

(a) Apud Chapeavillum, tom. I, pag. 298.
a ***

dreas Sylvius uno vel altero seculo Richildi posterior. Id jam quæritur, suone Hermannus jure, an uxorio Hannoniæ Comes exstiterit. Multa diversi generis hîc examinanda occurrunt. Comitatus Montensis & Hannoniensis unusne esset, an duplex? quinam ante Hermannum provinciam eam rexerint? utrûmne ab iis Hermannus, an uxor ejus traxerit originem? quod si uxor potius, an heres illa? nec bonorum tantum quæ allodia vocantur, sed & muneris atque honoris? nempe ut verbis hac in re jam usitatis utar, an Comitatus beneficium non esset ad nutum superioris domini revocabile? immò quamvis hereditarium fuisse ostendatur, an etiam filiæ defectu prolis masculæ in feudum succederent? an auctores, qui de Richildis hereditate in diversas videntur abire sententias, conciliari inter se queant, & quibus denique adstipulandum potius sit? Ea autem omnia si quis negotio quidem plena, at instructuosa notitiæ esse existimet, nâ is omnem rerum præclarissimis tantopere celebratam, ut nihil hîc à me addi oporteat. Ceterum cùm proposita quæstio (quamquam nec magis perspicuis verbis nec simplicioribus proponi ulla posset) tam multifaria tamen contineat; ego lucubratiunculam meam in varios paragraphos dividendam judicavi, quorum capita simul pro responsionis compendio sint. Et quia ita brevitati consulendum, ut tamen

PROLOGUS. iij

aptis probationibus ac præcipuè Historicorum auctoritate omnia stabiliantur; ipsa auctorum verba contextui orationis meæ inferui: ne si ad paginæ marginem aut calcem rejicerentur, bis res eadem diceretur, non sine legentium tædio & præscriptorum limitum transgressione. Ita quidem stili cura nulla habita est, atque ex confutis quasi centonibus inamœnum opus fit: verùm existimavi, ab illustri Academiâ non tam orationem politam, quàm argumenta brevissimè collecta postulari.

FINIS PROLOGI.



RESPONSUM

AD

QUÆSITUM

Quo jure Hermannus, maritus Comitissæ Richildis, Comes Hannoniæ fuerit, suæne an jure uxoris?

§. I.

Raginerus, pater Richildis, fuit Comes Hannoniæ.

I. **A**NTÆ Hermannum Richildi nostræ connubio junctum, de cujus in Hannoniam jure controversia movetur, ex ordine Comites Hannoniæ Ragineros seu Raineros tres recenset Jacobus Guisius (a); Miræus (b). Ragineri quinque in Hannonia : cur de singulis hic agatur.

(a) Jacobus de Guise, Ordinis S. Francisci Theologiæ professor de rebus Hannoniensibus Latine scripsit. Ejus opus anonymus anno 1446 in linguam Gallicam transiit, multa tamen interpolans, quæ lucem allatura videbantur, uti in præfatione suâ interpres fatetur. Sequor Annales Gallicæ redditos. volum. 3, cap. 1.

(b) Miræus Notitia Eccles. Belg. cap. 47. Diplomat. Belgic. editionis anni 1723, pag. 667.

& cum eo multi Ragineros quatuor; alii (c) etiam ejusdem nominis ac prosapiæ comites quinque computant. De singulis nonnulla commemorare necessarium duxi: neque una me impulit ratio, ut rem adeò altè repeterem. Frustrà atque incassum ostenderetur, ex his Comitibus Richildem ducere originem, nisi postremus saltem Raginerus eà potestate præfuerit, ut in prolem suam regimen transcribere ei fas esset; quo vitam agente, non omnes Comites ac Duces jure hereditario provincias aut pagos tenebant. Scilicet quantum collaborabant hi, ut munus ac dignitatem stirpi suæ in perpetuum assererent, tantum ex adverso vires intendebant Reges atque Imperatores, ut prohibitu aut rerum certè exigentiâ Duces ac Comites officio amovere possent: quâ quidem in re vario eventu certatum est. Præterea cum hereditariam in fœda successionem à Galliæ prius quàm Germaniæ regibus comites vel consecuti fuerint vel extorserint, eadem ego operâ examinaturus sum, Galliæ an Germaniæ regno obnoxia Hannonia tum esset. Tandem de sanguinis vinculo, quo Balduino Richildis obstricta fuit, hoc paragrapho disputabo, sic quidem prolixiori quàm vellem, sed quem hisce de causis non inutilem, neque à quæstione alienum spero judicatum iri.

Raginerus
I Hannoniæ
& Hannoniæ
Dux.

2. Raginerus primus, ab iis qui quinque agnoscunt, censetur, quem Dudo congregationis S. Quintini Decanus (d) sæculi X auctor *Raginerium Longi-collis* & paullò post *Rainerum prolixi-juguli* nominat, at non

(c) Butkens *Trophées de Brabant*, liv. 2, chap. 10. *L'Art de vérifier les dates*. pag. 632, édition de l'an 1770.

(d) *Dudonia scripta* edidit Andreas du Chesne volum. cui nomen: *Historiæ Normannorum Scriptores antiqui*. Lutetiæ Parisiorum 1614. Verba citata exstant pag. 74.

folius Hannoniæ Comitem, sed *Hasbacensem & Hainaucensem Ducem*. Hunc, narrante eodem Dudone, Rollo Daciæ Regis major natu filius circiter annum à Christo nato 875, multis præliis pulsum tandemque captum vinculis tradidit, mox tamen supplicante ac munera offerente Ragineri uxore, libertati restituit inquires : *Raginare Dux, milésque asperrime, regûmque & Ducum atque Comitum superbo satus sanguine... Sit... sempiterna inter me & te pax & amicitia. Non alius habetur ab eo, quem Regino (e) Reginarium Zundibolchi (Zuentiboldi Lotharingæ regis) Ducem fidiſſimum & unicum conſiliarium nuncupat, quem tamen Zundibolch, nescio cujus inſinâu, ait Regino, à se repulit, & honoribus, hæreditatibus, quas in suo regno habebat, interdictis, eum extra regnum infra X dies ſecedere jubet.* Aliorum adjutus copiis Raginerus se suæque invictè tuitus est, prout ex eodem Reginone percipimus : quîn ipsum dein Zuentiboldum regno expulerunt, & Ludovico Germaniæ regi dederunt se Lotharingæ proceres. Ludovico fatiſ functo, regi Francorum Carolo (cui *Simplicis* cognomen) subiecta fuit Lotharingia, opem in id præcipuam conferente Raginero. Eum propterea quanti fecerit rex Carolus, ex veteri ſcriptore Gallico refert Conradus, abbas Uſpergenſis (f) his verbis : *Hac tempeſtate Regenherus vir nobilis partium Caroli fidiſſimus tutor ſinem vitæ accepit, cujus exequiis Carolus interfuit. Hiſque peractis Giſiberto (poſtea Giſlebertum ſcribit) ejus filio jam adulto paternum honorem coram principibus, qui conſluxerant, liberaliſſimè contulit.*

(e) Regino in Chronico ſuo, ad annum 898.

(f) Conradus floruit circa annum 1230. Laudata verba leguntur pag. 152 in editione Argentoratensi anni 1609.

Raginerus
II filius Ra-
gineri I.

3. Præter Gislebertum, Ragineri I filius fuit Raginerus II paternorum honorum cum fratre heres : de eo enim Frodoardus in Chronico suo (g) ad annum 924 hæc habet : *interea Gislebertum Berengarius, qui sororem ipsius habebat, comprehendit, quinque oblati obfidibus sibi pro eo filiis Ragenarii fratris ipsius Gisleberti dimisit. Idem verò Gislebertus dimissus terram Berengarii Ragenariiue fratris sui & Isaac Comititis deprædationibus pluribus vastat. Inter fratres anno 928 pacem initam fuisse, idem Frodoardus subiungit. Ego pro re meâ duo hic observo : alterum est, terram seu ditionem Ragineri II Hannoniam fuisse ; nam Ragintrus IV ejus nepos Hannoniam recuperans in terra patrum suorum relocatus scribitur ab auctore infra num. 6 citando : alterum est, Raginerum II hereditario jure provinciæ suæ videri præfuisse, cum feuda regnante Carolo rege (Simplice cognominato) jure patrimonii possiderentur : posterius hoc latius differam alio paragrapho ; de Hannoniæ comitibus nonnulla colligere prosequor, quæ in sententiam meam existimo magno usui fore.*

Raginerus III
Comes Mon-
tensis & Han-
nonensis

4. *Post mortem Karoli regis (Simplicis, anno 929 defuncti) nolentibus Lotharingis Heinrico Regi (Germaniæ, ejus nominis I) subesse, quidam Lotharingus nomine Christianus, simulatâ infirmitate, Gislebertum Ducem (Ragineri I filium) ad se dolo evocatum cepit Regique misit, ut per eum Lotharingiam sibi subjiceret. At Rex (Henricus) inspectâ indusciâ & potentiâ Gisleberti, filiam suam Gerbergam ei despondet, & eum iterum Lotharingiæ præficit. Hæc Sigebertus in chronico*

(g) Frodoardi Chronicon edidit Andreas du Chesne Lutetiz Parisiorum anno 1636 ; & Bouquetus tom. 2. à pag. 76, qui in præfat. pag. 2v, asserere non veretur, nullum eo esse accuratius.

suo ad annum 927 refert, quamquam biennio post acciderint; sed de chronotaxi lis movenda hic non est. Notasse sufficiat, à quo tempore in Lotharingos dominati sint Germaniæ reges. Anno 936, qui Henrico emortualis fuit, filium ejus Ottonem I elegerunt Germaniæ & Lotharingiæ Optimates, inter quos Dux Gislebertus insignem locum occupavit (A); sed non diu Ottoni fidelis persistens, regnandi enim cupidus perpetuis bellis vitam traduxit. Duce è vivis sublato rex Lotharingiam Ottoni comitis Virdunensium filio gubernandam commisit, postea Conrado Franconiæ duci, ac tandem Brunoni fratri suo Colonienfium archiepiscopo, anno Domini 953. Circa id tempus comitem Montensem seu Hannoniensem fuisse Raginorum, omnino constat. Fidem in primis facit Sigebertus in chronico ad annum DCCCCLVI. hæc scribens: *Katherio ab Episcopatu Leodicensium ejecto, Baldricus, annitente avunculo suo Raginero Comite Montensi, episcopus substituitur.*

5. Qui Comes Montensis Sigeberto est, cum Hannoniensibus præfuisse docet auctor libelli Abbatum Gemblacensium (i) de Erluino primo Abbate memorans, *singulari amicitia confederatum* cum fuisse Raginero Comiti, qui ob proceritatem corporis cognominabatur Longi-collus, qui tunc temporis principabatur Hagiensibus. Ac ne putes de Raginero I sermonem fieri, subditur: *Hic Baldrici Leodiensis episcopi avunculus fuit.* Ceterum in verum inquirenti nihil dissimulatione opus est: quapropter adjungere lubet Raginorum hunc aliquando Hannoniæ regimine exci-

↳ Brunone
Archiepiscopo
in exilium
pulsus.

(A) De hac electione scitu digna narrat D. Des Roches in epitome Historiæ Belgicæ, parte I, pag. 233.

(i) In Spicilegio Dacherii Parisiis edito anno 1664, pag. 513.

disse, quamquam id fortè in argumentum assumpturus sit nonnullus, ut ostendat, jus successionis in familia Raginerorum vel nullum tum fuisse vel admodum vacillans ac debile; ut adeò Hermannus, licèt alienà è stirpe genitus, donari Hannonià ab Imperatore potuerit; & Richildis solo mariti jure Comitissà habeatur. Itaque Fulcuinus abbas (k) ejusdem comitis corruptam indolem ac sortem functam quidem sed promeritam depingens, cùm dixisset: *Baldericus Ecclesiæ Leodiensi præerat, is avunculum suum Raginerum unicè colebat, &c.*; addit sequentia: *Raginerus tyrannidem multiplicat, pauperes premit, & res ecclesiarum non Dei sed suas facit: pro quibus omnibus à Domino Brunone verè pacifico apud sanctum Salvium evocatus, confessus & læsæ Regiæ majestatis convictus reus, scriptus est ac perpetuo exsilio deportatus. Damnationis causam aliam, sed nec propterea falsam chronico suo ad annum DCCCCLIX inseruit Sigebertus: Bruno Archiepiscopus & Archidux Lotharingiæ secundas partes in regno fratris sui (Orthonis I) potenter & industriè administrans Raginerum Montensem Comitem, qui Longicollus cognominabatur, apud Valentianas evocatum capit, & irrevocabili exsilio damnavit, pro eo quòd regnum bellis inquietabat, vel quod verius fuisse dicitur, pro eo quòd mortuo Gisleberto Duce consanguineo suo, ea quæ Gislebertus uxori suæ Gerbergæ sorori Imperatoris in dotem contulerat, violenter ei auferre præsumebat. Bonis Ragineri ad fiscum publicatis, filii ejus Raginerus & Lambertus ad Lotharium (l) Francorum Regem confuge-*

(k) Fulcuinus de Gestis Abbatum Lobiensium, in citato Spicilegio pag. 172. Fulcuinus abbas factus fuit anno 965, eodem, quo Archiepiscopus Bruno diem clausit supremum, ut ipse nos docet ibid. pag. 175.

(l) Lotharius fuit rex Francorum ab anno 954 ad 986.

runt, Miræus hunc Raginerum Lamberti & Ragineri patrem, ejus nominis secundum; Burkens (*m*) tertium computat. Cur & ego tertium judicem, præter Burkeni rationes hæc accedit, quod apud laudatum chronographum Gislebertus Dux (nempe Ragineri I filius) hujus Ragineri non frater sed consanguineus audiat.

6. Ad Raginerum IV Lamberti fratrem pervenimus, qui an comitatum Hannoniensem & quomodo recuperaverit, plurimum interest cognoscere: & eo quidem accuratius tractanda res, quo propius ad Richildem accedimus. Baldericus (*n*) Chronici Cameracensis auctor gravis & doctus, quid de Comitatu actum sit, his verbis narrat: *Archiepiscopus Bruno, qui sub fratre monarchiam tenebat, Rainerum pro insolentis, pro rapinis, pro Ecclesiæ incursionibus, &c. exilio perpetuo damnatum fratri contradidit, terram suam (ejus, quæ vox in margine substituitur) primum Richario nobili viro, sed hoc defuncto, Warnero & Itaynaldo, quibus etiam defunctis, Godefrido atque Arnulfo Comitibus nobilissimis contulit, filiosque ejus præfatos à patrii finibus pro eisdem insolentis eliminavit. Illi (Reinerus & Lambertus, de quibus antea egerat) auditâ morte Imperatoris (Othonis I anno 973 defuncti).... patrios fines regressi terram Patris violenter volentes repetere, super Hagnam flu-*

Raginerus
IV Lamberti
Hannoniensis
frater.

(*m*) Burkens *Trophées de Brabant*, liv. 2, chap. 8.

(*n*) Baldericus Tervannensis Ecclesiæ Cantor, cerè non Episcopus Noviomensis & Tornacensis, hujus Chronici auctor jam censetur, uti tom. XI continuatores Bouqueti tum in *Præfat.* tum pag 122. Bouquetum & sese met ipsi corrigentes admittunt. Balderici obitum assignant anno 1093, aut huic vicino. Laudata verba exstant lib. I, cap. 94.

vium castrum *Bussud* (o) munierunt, ibique satis & super, dum licuit, sævierunt. Hoc autem juvenis Imperator (Otto II) audiens, collecto exercitu, castellum obsidione clausit, diruit, captosque rebelles in exilium misit. Paucis interjectis, alterum eorum conatum bellicum describit Baldericus : Interea prædicti fratres Rainerus & Lantbertus. . . in partes Karlensium (Francorum) concedentes Karolum Regis Lotharii fratrem pravis moribus deditum, pariterque Ottonem Alberti Vermandensium Comitis filium cum aliis quoque multis raptoribus suo auxilio adsciverunt. . . His ergo succipientibus atque comitantibus. . . ad Montem Castrum properatò contendunt, ibique anno Dominica incarnationis *DECCCLXXVI* super fideles Imperatoris, Comites, videlicet Godefridum atque Arnulfum, facto impetu, irruerunt, verùm irritò labore, prout Baldericus prosequens exponit. Hanc pugnam ad eundem annum chronico suo consignavit Sigebertus Gemblacensis, nec feliciorum armorum successum Raginero & Lamberto tribuit; sed quod hisce fratribus tum negavit fortuna belli, id concessit regiminis in Lotharingia immutatio. Audiatur eà de re Sigebertus ad annum 977 : *Ducatus Lotharingæ datur Karolo, fratri Lotharii Regis Francorum, multis insuper conducto beneficiis, ut & ipse ab insolentibus desisset, & fratris sui Lotharii motibus obsisteret. Filii Ragineri, ut pro se viriliter agerent, animati Francorum auxilio & affinitate (Raginerus quippe Hathuidem filiam Hugonis postea Regis; Lambertus verò Gerbergam*

(o) *Bussud* Gallicè *Bouffoit* près du village de *Perone*. Ita P. de Marne in præfat. ad Historiam suam *Namurcensem* pag. 56, trium auctorum eruditorum expositionem aliam rejiciens.

Gerbergam filiam Karoli Ducis duxere uxores) in terra patrum suorum relocati sunt : quamquam non eodem anno, uti apparebit ex num. 12.

7. Balduinus Avennensis (p) de Raginero hoc vera fallis miscuit, quæ secernenda hic sunt : Comes Flandriæ Arnulfus, ait, exercitu congregato, intravit Hannoniam & saisivit Comitatum Montensem, contra Rainerum & Lambertum, filios Raineri Longi-collis, qui fuit Comes Montensis, & destruxit castrum de Bossuc : tantumque guerravit istos pueros, quod oportuit eos fugere in Franciam ad quærendum auxilium. Lambertus duxit uxorem Gerbergam, filiam Caroli, postea matrem Henrici de Bruxella. Et Rainerus filiam Hugonis Capeti. Regressi ergo de Francia magnum exercitum congregaverunt, & ingressi Hannoniam terram suam recuperaverunt. Quod Rainerus Longi-collis comes Montensis existit, quod ejus filius Rainerus toro suo sociaverit Hugonis Capeti filiam, & admitto, & tamquam ad rem meam faciens pluribus probabo testimoniis : at verò R. P. de Marne in Historia Namurcensi pag. 57 observat, cum Arnulphum, adversus quem bella gesserunt Rainerus & Lambertus, erroneè à Balduino comitem Flandriæ appellari, cum esset Imperatoris fidelis, id est, ab Imperatore frudum tenens, ut mox ex Balderico vidimus; ubi Flandrum contra non regi Germaniæ aut Imperatori, sed Francorum regi obnoxium se profiteretur.

8. Raginerus IV ex Hugonis Capeti filia genuit Raginerum V Hannoniæ itidem aliquando Comitem. Luculento testimonio, & cui refragari nefas est, do-

Doct. filia
Hugonis Ca-
peti, Hannoni-
am occupa-
vit.

Raginerus V
Roberti regis
ex sorore ne-
pos, comes
Hannoniæ,

(p) In editione Antverpiensi anni 1693, pag. 5. Continuatores Bouqueti, Tom. XI, pag. 374, qui Balduinum floruisse aiunt circa annum 1180.

cet id nos Olbertus abbas Gemblacensis, ordinatus anno 1012, defunctus mense Julio anni 1048, in historia Inventionis, Miraculorum & Translationis S. Veroni, quam Ragineri V rogatu exaratam Bollandiani tom. 3 Martii, pag. 845 & seqq. ediderunt. In hac Olbertus Raginerum *Comitem nobilissimum* nuncupat, aliisque exornat elogiis quæ inutile mihi est referre; verba sequentia excerpo: *Comes Raginerus Ragineri iidem Comitis filius, Roberto Regi Francorum ex sorore nepos.... deliberavit supradictum sanctum (Veronum) inferre monasterio, quod præsentia S. Waldetrudis honoratum, situm est in Monte Castri-loco, &c.* Erat Robertus Hugonis Capeti filius; erat Roberti soror Hathuidis, quam Raginero nupsisse, ex Balduino Avennensi & Sigeberto didicimus. Porro si S. Veroni translatio facta sit anno 1012, quod censet Galopinus monasterii in Cella S. Gislenni monachus, qui eam annotationibus à se illustratam anno 1636 publici juris fecit; oportet, ut Raginerus V Roberto Regi ex sorore nepos anno saltem 1012 Hannoniam gubernaverit; de cujus uxore, uxorisque dote nunc dicendum est.

Herimannus
Eubonensis
filius matris
natus est jun-
gitur

9. Jam ab anno 1005, si Sigeberti in chronico non vacillet temporum ratio, *inortuo Othone Duce, Ducatus Lotharingæ datus erat Comiti Godefrido, filio Godefridi Ardennensis (9)*. Et in chronico Cameracensi Baldericus, libro 3, capite 7: *Defuncti Ducis Ottonis, filii Karoli, Godefridus.... adeptus est dignitatem. Idem libro 3, capite 9: Denique verò tempore procedente, Lantbertus jam dictus cum Rainero*

(9) Godefridus Ardennensis, Raginero & Lamberto exsulantibus, Hannoniam rexerat. Ita D. Des Roches Epitomes parte 2, pag. 12; & Delewarde, Histoire du Hainaut tom 2, pag. 208.

nepote suo, (Ragineri V) Raineri filio inimicitiam adversum Ducem Godefridum & Herimannum fratrem soluto sedere iterum excitavit. Commisso prælio occubuit Lambertus, cujus funestam mortem anno 1015 Siegbertus innectit. Lamberti filio Henrico & Ragineri ad arma redeuntibus, tandem Gerardus episcopus hostes inter sese & cum Imperatore conciliavit : *His ita gestis*, inquit Baldericus cap. x, *Rainerus ad integrandam amicitiam, filiam Herimanni Comitis sibi quæsit matrimonio copulari*. Binominem fuisse Herimannum, tradit Ægidius vetus auctor (r); *Herimannus*, inquit, *qui & Hezele, sæculi quæ sunt renunciens omnibus, Verduni apud ecclesiam S. Vitoni monachicum suscepit habitum*. Quapropter de eodem Hermanno intelligenda sunt verba Siegberti Lipsiani ad annum Christi 1005 : *Hezele comes* (filius Godefridi Eihemensis) *post mortem Ducis castrum Eiham cum provincia Bracbatensi suscepit & diu tenuit*. Hic... alteram filiam tradidit nuptui Reginero Montensi Comiti, simul cum tota provincia Bracbatensi. Deinde cum omnia sua ad votum ordinasset, relicto in manus Regineri castro & Comitatu, apud Verdunum effectus est monachus. Mathildem recentiores nominant hanc Herimanni filiam & Ragineri V sponsam : hoc certum, consanguineam eam fuisse Ragineri, & quamquam gradu remotiori, quarto nempe vel quinto, quod Baldericus (f) satis insinuat, attamen connubium displicuisse Gerardo Episcopo Cameracensi ; sed invitum

(r) Ægidius à Leodio, Religiosus, apud Chapeavillum tom. I, pag. 278.

(f) Baldericus in Chronico Camerac. lib. 3, cap. X; allegat enim auctoritatem S. Gregorii, Augustinum Anglorum apostolum monentis, ut quartæ seu quintæ propagnis iunctos ne separaret.

tacuisse, monentibus aliis episcopis: *Si tanti viri gener fieret, spem fore pacis; sin autem, naufragium patriæ.* In hunc modum Comes Montensis Raginerus V & Herimanni filiam, & propter eam Comitatum Eihamensem consecutus est; ac ne quis putet, eum vel ab obitu patris, vel ob secuta bella, ab Imperatoribus in legitimorum Comitum numero non fuisse habitum; Comitem eum agnovit anno 1018 S. Henricus Imperator in eo Diplomate, quo possessiones Abbatæ S. Gislæ in Hannoniâ sitæ Raginero postulante confirmavit (1). Anno 1024 cum Principes Saxonie in regium solium sublimassent Conradum, quem *Salicum* vocant, electioni se cum aliis Lotharingis opposuisset Raginerus *Comitem Haynocensium*, Baldericus lib. 3, cap. 50 tradit; sed simul indicat, nihil inde detrimenti Lotharingis obvenisse: nec quidquam invenio, quo minus ad obitum usque ditionem suam conservaverit.

ex quo matrem
mulo orta
est Richildis.

10. Jam verò is, de quo hætenus differui, Hannonie & Brabantie Comes Richildem nostram progenieravit. Auctores, quos magno numero colligam § III, id unanimes sibi que constantes affirmant adeò, ut majorem certitudinem historicam frustra requiras, præsertim nemine ex antiquis, quamvis id aperte non asserant, reclamante, aut Richildis originem in idubium vocante. Æquè certum est, eam ex Hadwide regis Roberti sorore genus trahere. Jacobus Guisius (2) ejus genealogiam textit in hunc sensum: *Hugo Capetus rex Francorum genuit filiam Hadguidam & filium nomine Robertum. Hanc Hadguidam Rex uxorem de-*

(1) Exstat Diploma apud Miræum in editione nova Diplomatum Belgicorum, pag. 508. tom. I.


(2) De Guise in Annalibus, volum. 3, cap. I.

dit Raginero filio Ragineri Longi-collis, & quā præfatus Raginerus secundus (quartum computavi) filium iustulit Raginerum tertium (immò quintum), qui ex uxore legitimā hanc procreavit Richildem. Solus, quod sciam, dissentit Albericus Monachus trium Fontium (x) ita ratiocinans: Soror regis Roberti Hadwidis Rainero Comiti de Hainaco, fratri Lamberti Comitis de Lovanio, peperit Beatricem... Comes autem Rainerus Junior de Hainaco, frater hujus Beatricis..., non fuit de matre ejus Hadwide, sed de alia; alioquin filiam hujus Raineri Richildem non potuisset Comes Flandrensis Balduinus habere uxorem. Quia enim Balduinus Richildis nostræ post Hermannum maritus, Adelæ filius fuit, Adela autem filia præfati Roberti; adeoque Balduinus tertio consanguinitatis gradu cum Richilde connexus fuisset, si hæc scilicet nacta fuisset Hadwidem aviam: idcirco Albericus duas uxores Raginero IV maluit adjungere. Quod ad propositum meum facit, Richildem Raineri filiam ponit, atque in eo cum aliis auctoribus consentit: sed dum commentatorem agens censet Balduinum numquam uxorem ducturum fuisse Richildem, si ex eadem stirpe processisset, hic enim verò aberrat. Hermannus abbas S. Martini Tornacensis abbas, relato matrimonio Balduini & Richildis, mox addit: Quod audiens Leo tunc temporis Papa Romanus... dixit conjugium illud non esse legitimum, quoniam consanguinitatis lineâ propinqui erant: prophetavitque posteros Balduini non diu possessuros utrumque comitatum, quod verum fuisse, finis probavit. Et Balduinus Avennensis pag. 8: Episcopus verò Cameracensis excommunicavit dictum Balduinum pro illo

(x) Albericus apud Continuatores Bouqueti, tomo X, pag. 288, ad annum 1031.

matrimonio Richildis Comitissæ : sed Leo papa, qui avunculus erat Richildis, absolvit eos, & inhibuit eis thorum. Quid plura conquirimus, immò quid actum agimus? Teste Olberto abbate, Raginerus idem qui Rainerus junior, erat Roberto Regi ex sorore nepos; ergo de Hadwide, nisi duas Roberti sorores duxerit Raginerus IV, quod magis absolum est credere; adde quòd vel sic ruat Alberici ratiocinium (y).

(y) Schema genealogicum, exhibens, quàm propinqui consanguinitate essent Balduinus & Richildis.



Herimanus in narratione restaurationis Abbatiz S. Martini apud Bouquetum tom X, pag. 236 de Hugone Capeto loquens sic profecquitur: Hujus filius præfatus Robertus, sciens Balduinum Barbatum Flandrensum Comitem tunc temporis magnæ esse potentiz, filiam Adelam adhuc puellulam filio ejus adolescentulo Balduino Insulano desponsavit, patrique ejus nutriendam tradidit.



§. II.

*Raginerus, Comitissæ Richildis pater, erat Comes
Montensis.*

11. **C**UM haud difficile probatu esset, in uno Comitatu provinciali aliquando duos, vel plures etiam, comites præfuisse, alterum provincie, alterum non ignobili alicui loco; existimabit fortassis nonnemo, Montensem Comitatum ab Hannonienti fuisse seculo XI ita distinctum, ut Hermannus maritus Richildis jure hereditario potitus Montensi sit, quem ille in dotem dedit uxori: adeoque ad quæstionem Academicam eum in modum respondendum esse, ut jure suo Hermannus alteram Hannonie partem, alteram jure etiam suo Richildis possederit. Cui sententiæ ut aditum intercludam, ea proferam, quæ Montensem & Hannoniensem unum eundemque statuunt Comitatum.

Comitatus
Montensis
& Hannoni-
ensis

12. Ægidius Aureæ Vallis monachus (?) hæc ait: *Baldricus hujus nominis primus, annitente avunculo suo Raginero Comite Montensi, Leodiensiun: substituitur Episcopus. Hic circiter tribus annis præfuit, qui & obiit..... Romanam Ecclesiam Joanne XII Papa regente. Summum Pontificatum gessit Joannes ab anno 956 ad 963: eo igitur tempore Raginerus aliquis Comes Montensis fuit, is nempe, quem ab Archiepiscopo Brunone ejectum fuisse, dixi numero 5, & qui principabatur Haginensibus, Richildis nostræ avus paternus. Hujus filii Raginerus IV & Lambertus parentum pos-*

non habuisse
distinctionem
comites,

(1) De hoc auctore vide infra num. 15.

sessionem recuperaverunt, hic Comitatum Lovanien-
sem, ille Hannoniensem : quod autem etiam Castri-lo-
cum, seu Montem Hannoniæ caput consecutus sit, fa-
cile ostenditur. *Lotharius Rex Francorum* (anno 984, ut
habet Sigebertus in chronico) ad invadendam Lotha-
ringiam rursus laborans, urbem *Viridunum* & *Gode-
fridum* ipsius urbis Comitem capit. Causam belli hanc
simulabat, quod *Godefridus* & *Arnulphus* Hanno-
niam *Ragineri* non restituerent. Jam verò hæc *Go-
defrido* præscripta lex fuit, ut si libertate frui vel-
let, cum Hannonia Castri-locum traderet *Ragineri*.
Testatur id *Gerbertus Remorum* prius, dein *Raven-
natum Archiepiscopus*, denique anno 999 Summus
Pontifex (a) hæc scribens : *Sigifridus Comes ad sua
redit. Godefridus Comes, si Castirilucium cum Hainao
Reniero redderet, seque filiumque suum Comitatu ac
Episcopatu privaret Viridunensi, de reliquo integram
fidem Francorum Regibus exhiberet, datus obsidibus
fortassis ad sua remeare valeret. Tandem anno 997,
nisi à vera Chronotaxi aberreret Albericus monachus
Trium Fontium, Comes Raginerus abstulit Montem
Castri Comiti Godefrido.*

se h'edem Ra-
gineri parat
te,

13. Et *Raginerum V Richildis* parentem Castri-
locum possedisse, ex numero 8 nullo negotio dedu-
citur. Auctore *Olberto Abbate, Comes Raginerus Ra-
gineri* itidem Comitis filius, *Roberto Regi ex sorore
nepos dilectus*..... (ex villa *Lembeca*) deliberavit su-
pradictum sanctum (*Veronum*) inferre monasterio, quod
præsentia *S. Waldetrudis* honoratum, situm est in Monte
Castri-loci; ac re ipsa intulit, prout *Olberti Historia*
subjungit.

(a) *Gerbertus* in Epistola sua 60 : apud *Du Chesne de Scriptoribus
Historiæ Francorum*, edit. Lutetiæ Parisiorum anno 1636.

subjungit. Cur autem extra Comitatum suum sacras reliquias transportaverit Raginerus, edicant illi qui Caltri-locum alteri Comiti tum vellent paruisse. Adde quod Richildem *Montensis Comitis filiam* nuncupet Lambertus presbyter ab Ardeâ patriâ cognominatus Ardensis, qui ab anno 800 ad 1200 Historiam Ardensensem deductam Arnulpho II Comiti Gilsenfi & Ardeâ Domino dicavit, neque de se fateri erubuit, conscribendæ Historiæ admovisse se manum, *circumspēctis & relectis omnibus Flandriæ Chronicis (b).*

14. Gislebertus in Chronicâ quamvis pag. 2 (c) *Hannoniensem & Castri-Montensem Comitatum* nominet, ut subdubites, an duo non sint, unum tamen indicat: *Hermannus Comes*, ait, *qui Comes Montensis dicebatur*, quia ipse Mons caput erat & est semperque erit totius Hannoniæ.... (& uxor Richildis) *Comitatum Valencenensem comitatûs Hannoniensis & Castri-Montensis honori addiderunt*. Quid enim sibi hæc volunt: *Mons caput erat & est totius Hannoniæ*, si alteri Comiti Mons, alteri Hannonia, iudice Gisleberto, subiecta fuisset? & qui hoc loco *Hermannum Montensem* appellat, scripserat pag. 1, *Hermannum jure hereditario possedisse Comitatum Hannoniensem*. Idem auctor pag. 16 & 17 narrat, quomodo Comes Hannoniensis ad ipsius ecclesiæ (S. Waldetrudis) *Abbatiam, & advocatiam ab antiquo sublimatus fuerit*. Idem pag. 19 ait: *Comes Hannoniensis tenet ab ecclesiâ Montensi situm Castri suisub annuo censu quinque solidorum in Cæná Domini solvendorum*. Neque hæc de suo tantum tempore Gislebertus, sed & de Reinero Comite & Alide

ex variis auctoribus colligitur.

(b) Apud Continuatores Bouqueti tomo, XI, pag. 295.

(c) De Gisleberto agam §. 5.

Comitissâ ejus conjuge intelligenda esse vult. Quotus ejus nominis Reinerus is fuerit, cujus uxorem Alidem vocat Gislebertus, mea nihil interest examinare.

§. I I I.

Richildis fuit proles unica & heres Comitis Hannoniæ Ragineri.

Richildem
Comitis Han-
noniciis fi-
liam & hero-
dem unicam

HANC propositionem certam indubitatamque faciunt seculorum penè omnium post Richildem auctores : neque enim solus eorum numerus, quamvis magnus ille sit, & vel propterea non contemnendus, ad assentiendum inducere nos debet; sed ea cura ac sollicitudo, quam in veritatis inquisitione adhibitam à multis constat. Nonnullorum ex iis, omnes enim laudare longum esset, verba juvabit audire; alios solo nomine ac designatâ libri paginâ indicabo. Ægidius Aurex-Vallis, Ordinis Cisterciensis monachus, qui ab anno 1230 ad 1251 scriptis floruit, omnesque Diœcesis Leodiensis bibliothecas perlustraverat (d) hæc habet : *Fuit autem ista Richildis Comitissa Hannoniæ, filia Raineri Comitis, filii Comitis Raineri Longi-collis. Hanc, quia unica erat hæres Comitatus Hannoniæ, duxit in uxorem Comes Flandriæ Balduinus &c. Albericus monachus Trium Fontium (e) : Anno ML Balduinus Flandrensis in vaso Haynonsium Comitatu, contra Imperatorem rebellat. Ex hoc conjicimus, quod Raynerus*

(d) Apud Chapevillium, tom. 2, pag. 9. Vide Vitam Ægidii tomo 2 de Gestis Pontificum Leodiensium præfixam.

(e) Albericus apud Continuatores Bouqueti, tom. XI, pag. 354.

junior Comes Haynonii jam erat mortuus, ejus filiam unicam Richildem nomine Comes Balduinus Insulanus filio suo dedit uxorem.

16. Jacobi de Guise, quem obiisse tradunt anno 1398 vel proximè sequenti, auctoritas in iis quæ Richildem attinent, vilipendenda non est; quamvis enim in rebus antiquioribus nimium credulus haud immeritò habeatur, de Richilde tamen acturus solito majus studium impendit. Satis id apparet volumine tertio, cap. 1, ubi ex aliis auctoribus Gislebertum refutat, qui videbatur Hermannum Hannoniensis Comitis filium existimasse, & Richildem non nisi jure mariti Comitissam (f). Eodem quoque volumine, cap. 3, memorat, se Ecclesiæ cathedralis Catalaunensis Annales omnes pervolvisse, monumenta omnia inspexisse, ut de Richildis primogenito filio, Catalaunensi Episcopo, explorati quid nosceret. Hic autem & Richildem Hannoniensis Comitis filiam scribit, & solam eam heredem fuisse indicat, cum ait filium ejus Rogerium renuntiassè omni juri successionis, quod ei in Hannonia à matre, sorore aut fratribus obtingeret (g).

17. D'Oudegerst in Chronicis Flandriæ Gallico sermone Antverpiæ excusis paginis 78 & 85 Richildem & Ragineri filiam fuisse, & jure proprio Hannoniam possedisse ait. Jacobus Meyerus in Annalibus Flandriæ ad annum MLI : *Defuncto Hermannno Comite Montensi, Balduinus Princeps..... invasit Hanno-*

(f) De Gisleberto vide infra §. 5.

(g) De Guise, volum 3, chap. 3 : *Tout le droit de propriete & de succession naturelle que il pavoit avoir en la conte de Hainau a sa mere, sa saur & a ses freres contents pour ung pris competant a eulx & a tous leurs successeurs il laissa & donna.*

niam, quâ subactâ, Castriloci celebravit Balduini filii nuptias cum Richilde ejus terræ Principe, Hermannî viduâ, Ragineri Montensium Comitû Filiâ. Butkens in Trophæis Brabantiae, pag. 61, Richildem Ragineri V filiam & heredem unicam indubitanter asserit.

in monu-
mentis Bel-
gicis versatis
est.

18. In eundem sensum eandemque sententiam de Richilde scripserunt Franciscus Vinchantius, Annal. Hannoniæ pag. 175; Henschenius Vitam S. Lietberti, Episcopi ad diem xxiiii Junii Annotationibus dilucidans; De Bossu Historiâ Urbis Montis pag. 35; Delewarde Historiâ generali Hannoniæ tom. 2, lib. 6; Wastelain Descriptione Galliæ Belgicæ paginâ 432; Vredius libro qui inscribitur *Sigilla Comitum Flandriæ*, pag. 5; D. Paquot in notis ad librum cui titulus *Flandria generosa*; D. Des Roches in Epitome Historiæ Belgicæ, parte posteriore pag. 43, alique: nec Miræum neglectum oportuit, in Notitiâ Ecclesiarum, cap. 47 & in Chronico Belgico ad annum 915.

§. I V.

Hermannus, Richildis maritus, Comitatum Hannoniensem adeptus non est ut patris sui heres.

Hermannus
Comitibus
Hannonien-
sibus non u-
riandus;

19. **E**X iis quæ hætenus in medium prolata sunt, ad quæstionis primam partem respondere aggredior. Cum petunt Academici Socii, fueritne Hermannus jure suo Hannoniæ Comes? dico, non Hermannî, sed Richildis patrem Hannoniæ Comitem postremum existisse: Hermannum itaque non fuisse Comitatus heredem, si nempe acceptâ jam significatione heredita-

tem intelligamus, ut à parentibus obvenientem. Non fuisse ultimi Ragineri filium, ulterius probare super-
vacaneum esset. Sed neque à penultimo vel antepenultimo originem duxit: quàm difficulter enim eo seculo cum consanguineis iniretur matrimonium, ex numeris 9 & 10 perspicitur, etsi alia deessent argumenta. Nemo etiam docet, Hermannum ab iis Comitibus progenitum, qui ejecto Raginero III Hannoniam rexerant: & quod efficacius argumentum est, Godefridus, de quo num. 9 plura memoravi, quisque vel Hannoniam ultimus invalerat, ut Sigebertus loquitur, vel eà fuerat donatus, ut vult Baldericus, Hannoniam per pacis fœdera abdicavit: immò Godefridi junioris frater Herimannus filiam suam Raginero V dedit uxorem, dotatam ditione Einhamensi.

20. Hermannò Richildis conjugii hereditarium in Hannoniam jus omnes, opinor, uno ore abnegarent hodieum, nisi quorundam antiquorum verba, ut primùm oculis occurrunt, hereditatem illam Hermannò viderentur asserere. Unde meum nunc est, ad auctores illos animum advertere, eorum dicta fide integrè referre, & quantà valeant auctoritate, exponere. A Lamberto Schafnaburgensi exordior, auctore Richildi cœvo, utpote qui ab anno 1058 Hirschfeldensis in Germania cœnobii monachus (*h*) Annales ad annum usque 1077 deduxit. Hic vir eruditus, auctor accuratus (*i*), dictus etiam à Natale Alexan-

Lambert
Schafnabur-
gensis verba
contestium
videretur lau-
dicare.

(*h*) Id de se testatur ad eundem annum Lambertus. Ejus Annales simul cum chronico Conradi Uspersensis & Annalibus Rheginonis prælo dati Argentorati anno 1609. Exstant laudata verba ad calcem paginar 481.

(*i*) Ita insignitur à continuatoribus Bouqueti, tom. XI in præfatione.

dro (k) veracis historici laudem consecutus, neque incultâ scripssisse ratione, ad annum MLXXI sententiam laudatorum hætenus historicorum videtur sùs deque vertere; en adeò ejus verba. *Filius Balduini, & Comitissæ Richildis, quàm deinceps parum spei in armis Francorum poneret, assumptâ matre suâ Richilde, ad regem Theutonicorum Heuricum Leodii, ut prædictum est, tum temporis postum venit, opemque ejus adversus patrui violentiam supplex inploravit. Atque ut magis eum sibi obnoxium faceret, Comitatum Reginheri quondam comitis cum castello munitissimo, Mons nomine, quæ scilicet, prædia mater ejus à priore marito suo dotis nomine acceperat, sancto Lamperto tradidit. Quæ rursus episcopus Leodiensis duci Gotefrido, ille itidem ipsi filio Balduwini beneficii loco dedit. Hoc rex quasi pretio redemptus, episcopo Leodiensi atque duci Gotefrido, item aliis Lutheringiæ principibus præcepit, ut in arduis rebus præsidio illi essent. Necesse non habeo monere lectorem, Comitatum dici traditum S. Lamberto propterea quòd à Richilde & Balduino filio oblatum sit ecclesiæ Leodiensi, insigni pietate S. Lambertum colenti patronum.*

sed qui in
multis hic
aberrat à ve-
ritate

21. Schafnaburgensi scriptore nixus nonnemo fortassis propugnabit, Richildem dotis nomine vel Hannoniam vel saltem Castellum illud munitissimum ab Hermanno, is enim prior maritus fuerat, accepisse; at meâ quidem sententiâ non rectè. Absit tamen, ut Huydecoperii (l) dictæis subscribens fabulatorem vocem, aut nugivendum: neque ad enervandum ejus

(k) Natalis Alexander, tom. 5, Hist. Eccles. ad sæc. XI, cap. 5, art. 5, pag. 502, num. 2.

(l) Huydekoper Aenmerkinge op de Rym-Kronyk van Melis Stoke parte I, pag. 279.

testimonium, respondere sufficiet, hominem alibi aberrasse à vero (m), ac propterea nullam hic promereri fidem: cum enim ab errore immunes scriptores nulli sint, nisi qui afflante Numine scripserunt; jam ex Historia exularet omnis certitudo, si propter nonnullos lapsus totum cujuscumque opus vocaretur in dubium. Verum enim verò cum in unâ eademque hac periodo multa alia coacervet Schafnaburgensis, quæ nemo certè pro veris admittet; dico in totâ narratiunculâ non tanti momenti esse ejus auctoritatem, ut quem ante nos auctores secuti non sunt, ducem sequi nos debeamus. Vitiatam esse totam periodum, paucis sic ostendo.

22. In primis illud quis credet, Balduinum sua S. Lamberto seu Episcopo Leodiensi obtulisse, ut obnoxium sibi faceret Henricum Imperatorem? Quam gratiam inire ab Imperatore Richildis potuit, quod Episcopo subjiceret Hannoniam? Immò finge potuisse id Henrico gratum accidere: cur ergo tot tantisque deprecatoribus usa est Comitissa, ut Imperatorem ad assensum inflecteret, quos in ipso Diplomate Henrici (n) legimus intervenisse? Si Balduinus Hannoniam S. Lamberto tradidit, ut Imperatorem, sibi obnoxium haberet: cur ergo Imperator non patrocinio tantum sed & donis inducendus erat, ut traditioni annueret: prout de rebus Leodiensibus melius instructus narrat Ægidius Aurea-vallis (o) in-

pute, cum
air Han-na m
Theodulio
oblatum in
gratiam Im-
peratoris:

(m) Quæ Lambertus ad annum 1071 de Vita... Roberti Frisonis narrat, minus fidem tutumque rerum Flandricarum scriptorem inveniunt. Continuatores Bouqueti Præfat. tom. XI, pag. XVI.

(n) Vide Diploma apud Chapeavillum, tom. 2. pag. 11.

(o) Ægidius apud Chapeavillum, ibid.

quiens : *Ipse Dominus Theoduinus* (is tum Leodii erat Antistes) *apud Dominum Romanum Imperatorem SERVITIO ET DONIS MEDIANTEBUS tantum effecit, ut ipse Imperator Leodiensi Ecclesiæ contulerit de consensu & laudamento prædictorum scilicet Richildis & Balduini filii ejus, omnia feuda, &c. Totidem ferè verbis idem Chronicæ suæ, pag. 10, inseruit Gislebertus : Dominus Theoduinus . . . SERVITIO ET DONIS MEDIANTEBUS effecit, quòd ipse Imperator Leodiensi Ecclesiæ contulit omnia feoda (p). Neque accuratus est Schafnaburgensis, dum Balduinum tamquam rei gerendæ auctorem primum in scenam producit : partes enim præcipuas egit Richildis mater. Illa non tam Henrici quàm Theoduii opem imploravit : illa super morte filii sui Arnulphi plurimum dolens, exhereditationemque filii Balduini superstitis graviter ferens, allodia sua omnia in Haynoniâ sita Episcopo Leodiensi Theoduii Principi potenti, sibi que satis vicino danda obtulit, ut AB EO in vindictam contra sapeditum Robertum auxilium haberet, & , acceptâ ab eo pecuniâ, stipendiarios proinde contra eundem Robertum conducere (q). Ut autem Comitatum quoque seu feuda, quæ juris erant Imperatorii, Episcopo subicere licitè posset, mater, plùs quàm filius, omnem lapidem movit animosa mulier & ob rem malè gestam exacerbatâ.*

& ab Imperatore Hannoniam tradidit Godefrido Duci.

23. Quis iterum Schafnaburgensi credat dicentem : quæ (prædia) rursùm Episcopus Leodiensis Duci Godefrido,

(p) Quàm graviter laboratum sit, ut Henricus præberet assensum, narrat Flisenus in Historia Ecclesiæ Leodiensis, lib. 8, cap. 38, & Delewarde in Historia Hannoniæ, tom. 2, pag. 321.

(q) Hæc Ægidius Aurex-Vallis supra laudatus.

tefrido, ille itidem ipsi filio Balduwini beneficii loco dedit. Quid? an Richildis & Balduinus ad recuperandam Flandriam auxilium conquirentes, Hannoniam Theoduno ita obtulerint, ut ei fas esset, hanc vel Godefrido Duci vel alii cuicumque in beneficium concedere? An, ne amissa provincia diutius privarentur, alteram etiam à se penitus abjecerint? Id, etsi Historicorum nemo contradiceret, à verisimilitudine nimium quantum alienum est: contradicunt autem Ægidius Aureæ-vallis & Gislebertus, iisdem verbis: ita quod sæpè dicta Richildis & ejus filius Balduinus sub una manu (&) uno hominio (ligio) universa alodia sua & familias & feuda AB EPISCOPO Leodiensi receperunt. His antiquior, immò & rei gestæ cœvus erat Lambertus Schafnaburgensis, sed longo tractu terrarum remotus fallaci vulgi rumori aures præbuit: Ægidius verò & quæ scripsit & alia plura in chartis majoris Ecclesiæ Leodiensis conscripta super hoc dicit (r).

24. Quæro tandem, quid *dotis nomine* à priore marito Richildis vel potuerit accipere? in Hannoniâ alia erant feuda, alia alodia. Feuda Comites Hannoniæ ab Imperatore tenebant, *Abbatiam & Advocatiam Montensis Ecclesiæ, & justitiam Comitatus*, prout laudati Gislebertus & Ægidius Aureæ-vallis uno ore nos edocent, iisque adstipulans Balduinus Avennensis pag 11. Alodia duplicis erant generis: alia vocabantur *Alodia propria S. Waldetrudis apud Castrilocom in Castro & in Villâ, Quarengnon, Gumapes, Frameries, Kienvi, Brainne la Whote, Brainne le Castel, Hal, Castres, Herines, Cuemes, Nimi, Vile seur Haine, & aliqua alia quæ non nomino*, inquit

in Hannoniâ
veri generis
bona
erant;

(r) Apud Chapeavillum, tom. 2, pag. 11.

Balduinus loco indicato. Hæc, ait ille, *Comitissa Richildis retinuit in allodium proprium*; quam phrasim ita interpretor, ut præfata allodia Episcopo Theoduno oblata non fuerint, tamquam in feudum convertenda, & hominio ligio mox recipienda. Favet interpretationi Gislebertus, qui cum dixisset, *Richildem & Balduinum sub unâ manu & uno hominio ligio universa allodia sua & familias & feoda ab Antistite Leodiensi recepisse*, statim subnectit, quasi se corrigens, *salvis tamen in omnibus B. Waldetrudis Allodiis propriis*, iisdem scilicet, quæ ex Balduino indicavi. Horum tertia pars ad Abbatiam ita pertinebat, ut in aliquibus Abbas (Comes scilicet) cum Capitulo emolumentum communicaret; uti latius exponit Gislebertus pag. 18 & 19. Alterius generis Allodia, utpote neque à Capitulo neque à quoquam alio dependentia, ea erant, quæ Richildis & Balduinus Theoduno liberè concesserunt, præcedente tamen pacto, ut mox ea Episcopus redderet, deinceps sub *hominio ligio* simul cum Comitatu possidenda.

nullo ex illis
in dotem Ri-
childi Her-
mannus di-
cendus est
consultus.

25. Quidnam autem ex illis, inquam, omnibus *dotis nomine* Hermannus dederit Richildi? Non Allodia propria B. Waldetrudis, ut res ipsa clamat: non posterioris generis Allodia; ea saltem non significavit Schafnaburgensis, neque de iis intelligi voluit, aut potest. Si enim per *Comitatum Reginheri* indicasset omnia quæ in Hannoniâ sub Reginhero existerant, jam etiam Allodia propria B. Waldetrudis inclusisset doti, quod fieri nequit. Superest ergo, ut per *Comitatum* intelligamus Iustitiam Comitatus nec non Abbatiam & Advocatiam Montensem, & si quid præterea ad Comitatus honorem pertineret, id est, feuda omnia imperialia. Verùm si per *Comitatum Reginheri* intellexit Feuda Schafnaburgensis,

non verè dixit, ea à Balduino tradita fuisse Theodduino aut Ecclesiæ Leodiensi: neque enim feuda Balduinus aut Richildis Theodduino submiserunt, neque in eorum potestate erat, ut ea alieno domino manciparent: ut adeo hac interpretatione novus error Schafnaburgensi impingatur. Dein si verbis ejus ita ut nunc jam explicata sunt, immò ut sonant, inhærendum est, ea in dotem ab Hermanno accepit Richildis, quæ Antistiti Leodiensium subjecit: atqui tamen Richildis non subjecit ei feuda imperialia, sed petiit tantùm, ut Imperator, supremus Dominus, feuda Antistiti obstricta esse vellet: malè itaque Schafnaburgensi nituntur, qui Comitatum, ut feudalem, Richildis dotem fuisse contendunt, ab Hermanno scilicet ei constitutam. Ponamus tamen ita intelligendum auctorem nostrum, ut Richildis censeatur dedisse Theodduino id, quod ad ejus preces Imperator dedit; & non tam verba ejus, quàm rem ipsam penitiùs inspiciamus: jam ergo auctore Schafnaburgensi consequens fiet, ut Hermannus Feuda Hannoniæ Richildi uxori dotem constituerit. Ast id quis in animum inducet ut credat propter solam illius auctoritatem, ubi in eadem hâc periodo tam multa occurrunt à vero aliena? Præterea, quod notare plurimùm juvat, Hannoniam auctor noster non Hermannus, sed *Reginheri Comitatum* nuncupat: quomodo ergo ad Hermannum devolutus est? non ut ad filium Reginheri; id certè nec Schafnaburgensis, neque post illum scriptor ullus effatus est. Effugium unum superest, ut ab errore vindicetur Schafnaburgensis, eamque fortassis multi inibunt viam, ut dicant, defuncto Reginero, Allodia quidem ad filiam Richildem hereditario jure devoluta, Feuda autem ab Imperatore concessa Hermanno Comiti, quæ hic illi concesserit in dotem.

Hanc ne amplectar opinionem, multa me absterrent. Primò quia totus hic locus in Schafnaburgensi displicet: secundò qui fiet probabile, Richildi non liquisset adire hereditatem comitatus paterni? an quia feudalis erat, adeoque à muliere alienus? sed qui licuit Hermannò dotare sponfam eo Comitatu, quem pater nequiret filia transmittere? hoc tamen argumentum præproperè attigi: nam quamvis Hermannus in dotem consignasset Hannoniam, nondum consequens fieret, ut ipsam hereditario jure possederit, quod jus & unicè hic examinandum erat, & Hermannò non competiisse, probare conatus sum, idque vel ex ipso Schafnaburgensi, Hannoniam vocante Comitatum *Reginheri* (S).

(S) Præclarum doctorum virorum effatum est, Auctores non collidendos, sed conciliandos, ubi saltem conciliationis ratio se utrumque offert. Eapropter maluerunt Academici quidam Socii, ut exhiberetur Lambertus Schafnaburgensis non tamquam scriptoribus ceteris contradicens, sed potius ut amanuensium aut describentium oscitantia deterioratus. Mendi manifestum indicium deprehendunt in eo, quod absurdum vero sit, Lambertum, cetera accuratum tersumque, Comitatum & castellum *prædia* scripsisse, quæ vox apud nullum utut barbarum, nedum apud elegantem adeò scriptorem eà significatione reperitur. Proinde locum depravatam in hunc modum restitui velint: *Comitatum Reginheri quondam Comitæ cum castello munitissimo, quæque adhuc prædia mater ejus à priore marito suo dotis nomine acceperat* &c.; verosimiliter autem multa prædia seu in Hannonia, seu in locis vicinis Hermannum possedisse, neque indotatam à se duxisse sponfam. Animadversioni non est quòd repugnem & quam animo grato suscepi, lubens volensque cum lectore communico.



§. V.

Gisleberti hac de re verba exponuntur.

16. **I**N rebus Hannoniensibus magna sit oportet Gisleberti auctoritas. Is etenim Balduini V Hannoniæ Comititis *Cancellarius*, sui temporis præcedentisque sæculi historiam pro munere suo perfectam habere debuit: *hujus Comititis... actibus tam in prosperitate quàm adversitate ferè omnibus interfuerat, uti de se refert, pag. 287.* Ei tum aliàs tum nominatim anno 1189 Comes jura sua apud Romanorum Regem tuenda commiserat (1). Profiteretur quoque paginà mox indicatà, se Gesta Comitum ex quamplurium ecclesiarum scriptis collegisse; ad quæ monumenta oculis perlustranda dubium non est, quin aditus ipsi patuerit, propterea quòd variis ecclesiis esset adscriptus, quas eadè paginà enumerat. Hisce de causis speciali examine discuti promerentur quæ memorat de Richilde.

27. Hic itaque vir talis tantusque ipso statim sui operis initio hæc verba fislit: *Ab Hermannò Comite, qui post quàm plures Comites Comitatum Hanoniensem jure hæreditario possedit, & cum ejus uxore Richelde Comitissâ, muliere prudentissimâ ac potentissimâ, initium habere volumus.* Gislebertum legerat Jacobus de Guise (u) aitque laudatis verbis significari, Her-

Gislebertus
sæculi XII de
XIII autem
quem Baldui
intererat;

perlorâ ejus
verba

(1) Auctorem vide pag. 210 & seqq. Porro ejus Chronicam ingenti reipublicæ literariæ commo publicâ luce donavit Illustrissimus D. Marchio du Châtelier typis Bruxellensibus anno 1784.

(u) Les Chroniques & Annales de Haynau, le tiers volume; feuillet 1. *Sigibert dit au commencement de son œuvre, &c.* Non de Sigiberto sed Gisleberto loquitur Guisius, id quod totus orationis contextus indicat.

mannum fuisse verum heredem naturalem, è Comitum Hannoniæ genitum sanguine; nec alio jure Richildem Comitissæ nomine insignitam, quàm quòd Hermannò nupsisset. Ceterùm Gisleberto contradicit, opponens ei Balduinum & Almericum, qui contrà affirmarent, fuisse Hermannum Ducis Thuringiæ filium.

non rectè in-
collebat Gub-
Co.

28. Si itaque Gislebertus pronuntiasset, verum naturalemque Hannoniæ heredem fuisse Hermannum; ex Guisio duos antiquos auctores adversarios nactus esset, qui ejus fidem utcumque dubiam facerent. Ast ego nullus dubito, quin à Guisio malè intellectus sit: nam quòd dicatur Hermannus *jure hereditario* Comitatum possedisse, illa verba tam varium sensum patiuntur, ut nisi se ipse explicaret auctor, determinati nihil ex ipsis haberemus. Antonius Dadinus Alteserra (x) probat ostenditque, sub primâ & secundâ Regum Francorum familiâ hanc formulam, *hereditario jure* prædia possidere, idem frequentissimè significasse, quod, possidere in allodium: & qui vel donatione vel emptione, vel alio titulo, allodium acquisiverant, illud hereditario jure possidere dicebantur. Exempla apud eum collecta referre supersedeo. Quia autem Gislebertus de Hermannò non scribit, eum Allodia, sed Comitatum *jure hereditario* possedisse, dico ex illâ loquendi formulâ etiam non fieri consequens, ut tamquam patris heres Comitatum Hermannus consecutus sit. In Chronicâ MS. *De Origine Ducum Brabantiae*, Ducatus emptio jus hereditarium efficit: ait enim Chronice auctor: *Anno MCCLXXXVI... cum Johannes Dux Lotharingæ acquisitum*

(x) Alteserra de Ducibus & Comitibus Provincialibus Galliae, Tolosæ anno 1643, lib. 2, ubi agit de *Allodiis*, cap. 1.

*sibi per emptionis titulum Ducatum Lemburgensem hæreditario jure possidendum adire nititur (y). Sed quid aliunde exempla conquirimus? ipse Gislebertus pag. 4 satis ostendit, eas voces non semper à se adhibitas, ut exprimeret hereditatem, quæ à patre obvenit. Balduinus, inquit, Comes Flandriæ cum Richelde uxore suâ Comitatum Hanoniensem propriè & hæreditariè possedit. Jam verò Balduinus non ut paternorum bonorum heres Hanoniam administravit: sed tum dictus à Gisleberto est hæreditariè possidere Comitatum, cum ejus filii, amotâ prioris rori sobole, in Comitatus possessionem erant successuri. Atque in eundem omnino sensum priora verba accipe: *Hermannus Comitatum jure hæreditario possedit*, id est, ita possedit, ut eo defuncto filius nepolve Comes futurus esset. Simili sensu locutos illius seculi scriptores, demonstrat Du Cange in Glossario Latinitatis mediæ & infimæ.*

29. At, inquires, quamvis Gisleberti hic locus sic commodissimè exponatur, tamen quæ pagina 2 exaravit auctor, designatum sensum prorsus evertunt, sic enim loquitur: *Hermannus Comes decessit: Richeldis verò Comitissa vidua supervixit & totam terram Hanoniensis Comitatus tam de jure dotalitii, quàm de procuratione puerorum suorum tenuit*. Ecce cum Lamberto Schafnaburgensi conspirat Gislebertus, ut Richildem non suâ hereditate Comitissam arbitremur, sed ex dote ab Hermannò consignatâ.

Posterior
ejus verba de
dote Richil-
dis.

30. Respondeo Gislebertum disjungi ingenti intervallo à Schafnaburgensi scriptore: hic enim non terram Comitatus, sed Comitatum ipsum Richildi in dotem tribuit, & à priore marito acceptam: Gislebertus verò Hanoniam universam fuisse dotalitium

Dos tam à
parentibus
quàm à spon-
so ex seculo
constat.

(y) Chronica hæc conscripta censetur sub finem seculi XIII.

ait, à quo autem illud concessum sit Richildi, in medio relinquit. Animadvertendum porro est, dotem iis seculis non tantum à sponso sed & à parentibus constitutam fuisse. Quòd sponsi dotarent sponfam, dissimulandum non est. Muratorius in opere quod inscribitur *Antiquitates mediæ ævi* (1), publici juris fecit Diplomata tum Ludovici II Imperatoris anno 850, tum Lotharii Regis Lotharingæ anno 867, tum aliorum, qui sponsæ suæ dotalitium designant (a). Quod secula Richildi posteriora attinet, Yolendis Comitis de Ghelrà filia, Balduini Comitis Hannoniensis vidua tam de jure dotalicii, quàm de parvitate Balduini filii sui Hanoniam diu tenuit; quæ ejusdem Gisleberti, pag. 43, verba sunt. Verum nemo, puto, inficiabitur, etiam à parentibus dotem seu dotalitium filiabus constitutum. Quod num. 9 ex Sigeberto Justii Lipsii protuli, & Meyerus ad annum 964 ponit in Annalibus Flandriæ, Mathildem Comiti Montensi Raginerio nupsisse, dotemque illi attulisse Eynhamum cum totâ ditione Brachantensi, præclarum est hac in re argumentum, etsi Vadderio displiceat. Negat ille quidem (b) eam fuisse Hezeloni potestatem, ut Brachbantum, feudum Imperiale, filix suæ dotem daret: sed hæc mera conjectura est Vadderii, ex eo orta, quòd opinaretur, in Imperio filias à feudorum possessione exclusas.

De dote à
Raginerio da-
tâ Interpre-
tandus est G.
sicbertus 1

31. Ut itaque ad Gislebertum redeamus, dico ejus verba sic intelligi posse, ut Richildis Hannoniam tam de

(1) Muratorius tom 2, Disputatione 20.

(a) Dotatam fuisse à Gisleberto Duce Gerbergam, intelligitur ex num. 7.

(b) De Vaddere *De Origine Ducum Brabantix*, tom. I, pag. 297, editionis 1784.

de jure dotalitii, scilicet designati à Raginero patre, quàm de procuratione filiorum suorum gubernandam habuerit; id est, de solo jure dotalitii, quamdiu sobole careret; quod si gigneret prolem, tam de jure dotalitii, quàm de suorum procuratione præfset Hannoniæ. Addo, verba non pati expositionem aliam: non enim de solo Comitatus honore, sed de *totâ terrâ Comitatus*, id est, tam de Allodiis quàm Feudis agit Gislebertus, quæ omnia nemo profectò Hermannò concesserit. Neque est, quòd obijciatur, ita ferè de Richilde locutum auctorem hunc, sicut de Yolende, de qua num. 30 dedità operâ mentionem feci. Nam cùm jus hereditarium & jus dotalitii vario diversoque sensu accipitur, genuina significatio ex adjunctis eruenda est. Jam verò, quàm certum habemus, Yolendam non fuisse Comitis Hannoniensis filiam, adeoque nec heredem, tam certum est, Comite Hannoniensi progenitam Richildem.

32. Dos Richildis à patre Raginero constituta undequaque probabilis est. Post Raginerum I, mulier nulla Hannoniam gubernaverat, uti ex paragrapho I, satis arbitror patère. Mulierum in Feuda successio nondum sic invaluerat, ut ubique firma ac rata esset. Richildis Allodiorum heres, an in Comitatum quoque esset reipsa successura; id est, an propinquorum nemo imbellem feminam è debitâ successione deturbaturus esset; an Imperatores sumptâ occasione Hannoniam sibi arctius devinciendi, non essent occupaturi provinciam, rejectâ herede resistere imparatâ: hæc enim verò & ejuscemodi alia inducere debuerunt Raginerum, ut unicæ proli viâ tutissimâ prospiceret, utque consanguineorum potentiorumque cupiditati nullam nocendi ansam relinqueret supersti-

que & aliis
argumentis
probatum.

E

tem (c). Tutissimum autem visum est, ita heredem scribere filiam, ut nec invito Imperatore nuberet, & non nisi dotalitii jure & tamquam prolium procuratrix Comitissa haberetur. Id, etiamsi non insinuavisset Gislebertus, noticia istorum seculorum suaderet existimare. Itaque Gislebertus haudquaquam dissentit ab auctoribus aliis, qui Comitatus heredem ponunt Richildem: neque hæc sibi repugnant, quod ex prudenti cautela pater dotem fixerit Hannoniam, quodque filiae tamen jure hereditario Hannonia deberetur. Jam verò eam propter sexum amovendam non fuisse à Feudi possessione, probare intendo.

§. VI.

Richildis à Comitatus Hannoniensis possessione propter sexum exclusa non fuit.

Respondetur
ad secundam
partem Quaest.
tionis.

33. **Q**UÆSTIO Academica duas partes complectitur. Prius id petitur, an Hermannus *jure suo* Comes existerit? dein, si illud negetur, an non saltem *uxorio jure* Hannonia potitus sit? Ad priorem partem respondi hætenus. Ad posteriorem quod spectat, in eo difficultatis nodum situm existimo, an Comitatus Hannoniæ ad prolem femineam devolveretur. Nam si Comitatus heres non fuit Richildis, neque ulla ratione eum à patre adipisci potuit; dicere oportet, Hermannum et si non suo jure, tamen nec propter conjugium fuisse Comitern, sed ab Imperatore Comitatum in benefi-

(c) Haud absimile exemplum præbuit seculum nostrum in Augustiniana domo Austriacæ: res notior est, quam ut referri à me oporteat.

cium hereditarium accepisse. Ceterum hic non de Allodiis, sed de Feudis in Hannoniâ differimus.

34. *De Origine Feudorum pro moribus Galliæ scribens* laudatus suprà Dadinus Alteserra, cap. 2 docet, beneficia seu Feuda, quamvis initio fuerint temporaria & precaria, ita ut dantis arbitrio revocari possent, tamen jam à Ludovici Pii tempore venisse ad liberos, requisito tamen principis consensu : tandemque ruente secundâ regum stirpe, Feuda omnia transiisse in perpetua dominia, jure patrimonii deinceps possidenda. *Haud dispari*, inquit, *fato, labente Imperio, Feuda in Germaniâ in hereditaria degenerârunt* : & Conradus I, qui eodem ævo cum Carolo simplice vixit, primas de Feudis perpetuis & hereditariis leges condidit. Hæc, & argumenta cò spectantia Dadinus. Sed an Feudi heredes filie? En ex eodem auctore responsum : *Feuda sui naturâ & Longobardorum moribus sunt masculina, & in his sæminæ non succedunt, nisi aliud ab initio actum sit; quia sæminæ Faidam Levare, id est, militare non possunt.* Subjungit tamen, paulatim Feuda à rectâ lege descivisse adeò, ut feminæ Feudorum composites factæ fuerint.

35. Ante Richildem jam Comitatus feudales non una femina obrinuerat. In origine Comitum Vindocinensium (d) id refertur : Rainaldus Episcopus Parisiensis (obiit is anno 1016) filius Burcardi Vetuli. Post ejus mortem Fulco Nerra Andecavorum Comes honorem Vindocinensem tenuit. Hares Burchardus cum Adelâ matre suâ de manu Fulconis Comitum honorem recepit. Mortuo Burchardo tenuit mater ipsius honorem (id est, Comitatum Vindocinensem), sociavitque sibi Fulconem filium suum ad honorem deservendum. Mitto

Feuda quando hereditaria facta sunt.

Nobiles feminae ante Richildem Feudorum composites fuerunt.

(d) Apud Continuatores Bouqueti, tom. XI, pag. 31.

exempla longinqua : quod nostros Comites accedit propius , unum ex Gestis Abbatum Gemblacen-
sium (e) propono. *Commissa pugnâ in Florinis inter Lambertum Comitem, filium Ragineri Longi-Colli & Godefridum Ducem ; cum Lambertus ibidem gladiis cæsus accepisset vitæ finem, conjux ejus Gerberga nobilissima... annitente filio suo Comite Henrico, FEUDUM PROPRIETATIS SUÆ, quod Tortosa vocatur, tradidit Gemblacensi loco. De eadem Gerbergâ Balduinus Aven-
nensis (f) asserit, fuisse eam Comitissam Lovaniensem de hereditate suâ. Cum tamen id neget De Vaddere (g), & longioris examinis res esset, Gerbergæ Comitatum prætereo. Monuisse sufficiat, jam tum antiquis legibus aut consuetudinibus feodalibus derogatum fuisse.*

Ordo suc-
cessionis in
Hannonia ex
Francorum
legibus vide-
tur repeten-
dus.

36. Quamvis autem constaret, in Imperio diutius quam in regno Francorum id usitatum, ut à Feudis arce-
rentur feminæ; nihil id tamen ad Hannoniam, quam provinciam Richildis proavi rexerant, antequam Ger-
manix reges fecerant suam. Raginerus IV, de quo num. 7, terram patrum suorum auxilio Francorum

(e) Apud eosdem Continuatores, ibid pag. 201. Auctor anony-
mus qui *De Gestis Abbatum Gemblacensium* scripsit, se Sigeberti Gem-
blacensis discipulum profitetur.

(f) Apud Continuatores Bouqueti, tom. XI, pag. 376 : sed hæc
voces, *Gerberga* verò erat *Comitissa Lovaniensis de hereditate sua*,
absunt à Chronico Balduini quod edidit Jacobus Le Roy, Antver-
piæ 1693.

(g) De Vaddere de Origine Ducum Brabantix, parte I, cap. 12,
in editione anni 1784, pag. 274 : ubi tamen observare debuisset
id quod Continuatores Bouqueti, tom. XI in præfat. pag. CLXVI
perspexerunt, nempe *Allodiorum* nomine sæpe designari beneficia he-
reditaria. Ceterum iidem auctores ibid. pag. CLXXII aliis exemplis pro-
bant, nobiles feminas successisse in Feoda, & earum dotem ex Feo-
dis constituisse.

adeptus est, Hugonis Capeti ductâ filiâ. Verisimile non est, hoc pacto eum in Hannoniam regressum, ut solos filios heredes haberet. Neque in omnibus provinciis æqualiter viguit potestas Imperialis: licet igitur alicubi filiâ Ducum aut Comitum à Feudis legantur exclusæ; argumentum, quod à simili vocant, hac in re haud magni momenti est. Filiarum juri adversum censetur, quod apud Sigebertum in Chronico ad annum 1034 memoriæ proditum est: *Friderico Mosellanorum Duce mortuo, quia mares filios non habebat, quibus Ducatus competeret, Gothelo dux, impetrato ab Imperatore etiam Mosellanorum Ducatu, in Lotharingiâ potentiâs principatur.* Idipsum totidem verbis (nisi quòd pro Gothelo scriptum Gozelo sit) legere licet in Historiâ S. Laurentii Leodiensis (h). Sed præter illa, quæ modò observavi, notandum est, Ducatum Mosellanorum tum nondum hereditarium ab Imperatore habitum: audiatur Sigebertus ad annum 1045: *Gothelo Dux obiit, cujus filius Godefridus, dum ei Ducatus Mosellanorum denegatur, altero Ducatu repudiato, contra Imperatorem rebellat* (i).

37. Ego de hac quæstione ita censeo: non necessario antiquas consuetudines, antiquas leges feudales inspicere; non necessario examini subjicere morem alibi servatum: sed prætermittâ ceterarum Provinciarum historiâ, iis quæ de Hannoniâ & Richilde tradita sunt, unicè inhærerè posse. Filios patribus in principatum successissè, vidimus. Si interruptus fuit ordo, & Raginerum III expulcrit Archidux Bruno, consequitur

Ante Richildem Comitum Hannoniæ hereditarius; post Richildem heredes filia.

(h) Apud Martene in *Amplissima Collectione*, tomo 4, col. 1058.

(i) Meyerus ad annum 1005 narrat, non æquo animo tulisse Francos, quòd Othonis Lotharingiæ Ducis filiâ à possessione Lotharingiæ, defuncto patre, removerentur.

tantum, ut iudice Brunone, Feudo esset indignus. Feudum enim committitur, ut loquuntur, seu ruit sponte sua auferturque ob feloniam, ob desertionem Domini, ob contumaciam & injuriam in Dominum, ob novos census inductos, prout ostendit Alteserra *De Origine Feudorum* cap. 16. Post Richildem Joanna & Margareta, ambæ Balduini VI filix, defuncto patre, Hannoniæ ex ordine præfuerunt, illa ab anno 1206, hæc ab anno 1224. Unde cum Sigismundus Imperator anno 1418 (k) Joanni Bavaro Hannoniam concederet, exclusâ Jacobâ Comitis filiâ, idque ex hoc, præter aliâ capita, quod Feudum Imperiale defectu proles masculinæ ad Imperium devolyeretur; opposuere se pro viribus Hannonienses, causantes morem patriæ: Hannoniam enim quantumvis feudalem Imperii, jam antea à mulieribus gubernatam, scilicet (præter Waldetrudem) à Margarita Constantinopolitana, Joanna, Richilde. An Waldetrudis rectè in exemplar poneretur, hujus loci non est examinare.

Richildis
Comitatus

38. De Richilde eos bene pronuntiâsse, sic ostendo. *Hæredem Comitatus* eam scribit Ægidius Aureæ-Vallis, cujus verba & elogium num. 15 retuli. Balduinus Avennensis (l): *Postmodum fuit ibi Comes, Hermannus nomine, per uxorem suam Richildem.* Atque iterum de Richilde scribit: *Abbatiam & Advocatiam Montensem ac justitiam Comitatus... tenuerat ab Impera-*

(k) Refert id Ruteau in Annalibus Hannoniæ, pag. 376. Anonymi Chronicon Ducum Brabantix typis editum Lugduni Batavorum anno 1707, pag. 157: *Patria Hannoniensis responsum misit scripto ad Dominum Joannem de Bavaria... scribendo... de Hannoniâ, quod... si in Imperio consistat... sapius devoluta fuit ad heredes filias.*

(l) Chronicon Balduini typis Antverpiensibus editum anno 1693, pag. 8, & 11.

tore (m). Andreas Sylvius in Synopsi Franco-Merovingica, Seculi XII auctor (n) de Balduino Hainonienſi Richildis noſtræ marito ait : *utrumque Comitatum tenebat, Flandrenſem per patrem, Hainonenſem per Richildem Comitiffam, viduam Herimanni Comitis Montenſis, cui nupſerat*. Edifferant autem nobis, quo pacto per Richildem Comes Balduinus fuerit, qui mulieres in Hannoniâ à Feudis remotas fuiſſe contendunt. De multis aliis auctoribus, qui jus ſucceſſionemque Richildis vel apertè indicant, vel inſinuant, egi § III. Huic ſententiæ non adverſatur Giſlebertus, uti oſtendi § V. Lambertus Schaſnaburgenſis, qui ſolus adverſæ partis advocatus eſſe, ſed difficulter tamen, poſſet, quo loco hac in re habendus ſit, § IV expoſui. Aliarum Provinciæ conſuetudines Richildi non officiunt : ut enim jam dicere cœpi, utque obſervant Benediſtini monachi, qui Bouqueti collectionem continuârunt (o), *Ordo ſucceſſionis in Feoda pro moribus cujuſque provinciæ diverſus deprehenditur*.

39. Si quis tamen perſuaſum ſibi habeat, ſaltem in Provinciis Belgicis eandem ſucceſſionis legem obſervatam; argumenta non deſunt, quæ Richildis juri favcant. Narrante Giſleberto pag. 2, Hermannus & uxor Richildis, *deſuncto Comite Vulencenſi abſque*

ſcilicet Hainonienſis, Vulencenſis, & Brabanticiſ;

(m) Quòd ab Imperatore tenuerit Comitatum, id ejus juri ſucceſſionis non obſtat, ſed confirmat potiùs. Eo ipſo quòd Feudum eſſet, ſolemnem Imperatoris ceſſionem requirebat. Vide num. 41.

(n) Andreas Sylvius Archiprior monaſterii Marchianenſis hiſtoriam ſuam ad annum 1194 deductam inſcripſit Petro Arrebatenſi Epiſcopo conſecrato circa annum 1184, viâ ſuncto 1203. Exſtant laudata verba parte 2, lib. 3, pag. 797 Editionis Duacenſis anni 1633.

(o) In Præfatione, tom. XI, pag. CLXVI.

proprii corporis hærede, tam jure hæreditario, quàm coemptione factâ cum quibusdam nobilibus, qui in hæreditate illâ reclamabant, sibi in proprietatem Comitatum illum vindicaverunt, & ipsum Comitatum Valencensem Comitatus Hanoniensis & Castri-Montensis honori addiderunt. Delewarde & d'Outreman (p) alique, quod sciam, omnes hereditatem non Hermannos sed Richildi tribuunt. Addit quidem Doutermannus nonnullos se Richildi opposuisse, hoc prætextu, quòd Feudi Imperialis expertus esset mulier: sed vel hæc oppositio facta non est, vel contempta rejectaque fuit. De Einhamensi ditione, quæ Mathildis dos ejusque filiæ Richildis hereditas existit, cgi num. 9 & 30. Quomodo post mortem Godefridi, Goscelone Duce Lotharingæ geniti, dux Godefridi Sorores Raelendis & Yda inter se contenderint *super Allodiis & Feodis*, tandemque Raelendis non ob sexum, sed pravo aliorum studio ab hereditate amota fuerit, Gillebertus pag. 8 litteris consignavit.

jure suo pro-
prietatem ad-
ministravit.

40. Denique ita se gessit Richildis, ut sibi certè visa sit non alieno sed suo jure Hannoniam gubernare; cujus rei non leve argumentum præbet narratio Anselmi Canonici (q) Comitissæ huic æqualis. *Contigit aliquando Hermannum Montis (qui Castrorum locus dicitur) Comitem cum Balduino Flandrensi jure jurando fœdus inire; cujus uxor, magis ex animi muliebris instabilitate, quàm justarum partium ducta favore simulata*

(p) Delewarde, tom. 2, pag. 293. D'Outreman in Historia Valencensi, pag. 103.

(q) Anselmus apud Chapeavillum tom I, pag. 298. *Vitam Gazonis Episcopi*, cui cognatus fuit, veraciter sibi notum plene descripsit; uti judicat Sigebertus Gemblacensis de Scriptoribus Eccles. cap. 161.

simulata virum suum à perjurio velle solvere, re autem verâ se ejusdem mariti sui proditiōe polluere, Dei sacerdotem (Wazonem Leodiensium Episcopum) hujus sceleris consensu conata est maculare: mandans ei per nuntium, quod si Imperatori gratus esse velit, cum armatis veniat: locum & tempus, ubi & quando maritum eidem Imperatori præsentandum capiat, sollicitè perquirat. Attonitus ille tanti facinoris novitate: hæcenus, inquit, nec famâ nec læctione compertum habuimus, uxorem aliquando maritum prodidisse. Hæc Anselmus, in cujus verbis nemo me monitore opus habet, ut principatum Richildis non tamquam à marito dependentem, sed ipsa solâ nitentem absolutumque perspiciat: alioquin non Comitem tantum, sed se suâque omnia ivisset perditum Comitissâ, si femineum consilium secutus Wazo Hermannum in Cæsaris potestatem rede-gisset, feodali Hannoniâ haud dubiè privandum. Periculo autem amittendæ provinciæ se non exposuisse putanda est mulier astuta & dominationis ultra modum avida. Post mortem secundi conjugis ipsa cum Balduino filio suo in curiâ suâ officia hæreditaria instituit, Dapiferorum scilicet & Pincernarum &c., quæ pag. 8 Gislebertus recenset. Quid plura? Ipsa cum filio Balduino Allodia & Feuda hominio ligio ab Episcopo Leodiensi recepit, tenueratque Hannoniam de jure dotalitii. Si propter sexum impedita non fuit, ut vel sic Feudorum compos fieret, à quocumque tandem dotalitium consignatum sit; cur ob sexum exclusâ fuisset ab hereditate paternâ?



§. VII.

*Hermannus tamen non solo jure uxorio Provinciam
Hannonia administravit.*

Hermannus
est non Co-
mitem he-
reo, videtur
tamen ab Im-
peratore in-
stitutus Co-
mes;

41. **F** E U D U M sine investiturâ seu solenni Feudi
cessione & confirmatione non constituitur. Investitu-
ram sequitur fides, id est, jusjurandum fidelitatis, &
hominium, quo vinculo beneficiarius principis homo
seu Clientis fiat. (r). Cum autem Justitia Comitatus per
Hannoniam & Feudum esset, & ab Imperatore ten-
eretur, quemadmodum non semel ex antiquis aucto-
ribus indicavi; quæri à me posset, utrumne illud Feu-
dum soli Richildi Imperator concesserit, an potius
Hermannò simul & Richildi, sic ut ambo jusjurandum
fidelitatis dederint, ambo se Imperatoris Clientes
professi fuerint. Inmò illud ipsum videntur etiam quæ-
rere Domini Academici: nam, quo jure Hermannus
Comes fuerit, dupliciter accipi potest. Alter verborum
sensus est, quo jure Comitatum sit consecutus; alter,
quo jure Comitatum seu provinciam administraverit.
Dixi, ostendique nullum Hermannò jus fuisse, ut Co-
mitatum nancisceretur. Quod ad posteriorem sensum
atinet, sic ego existimo, Hermannum, ubi cum Ri-
childis jugali vinculo fociavit, ab Imperatore Comitem
institutum, seu, ut aiunt, investituram accepisse Feu-
dorum, ac propterea non solo jure uxorio præfuisse
Hannoniensibus, quamvis per eam & ob eam acce-
perit administrandam provinciam.

(r) Dadinus Alferra de Origine Feudorum, cap. 7 & 8.

42. Jacobus Guisus cū dixisset vol. 3, cap. 1, Hermannum Duce Thuringiæ progenitum, eique, quod non obiter legendum, ab Imperatore uxorem datam Richildem Comitissæ Hannoniensis filiam; indubitanter cap. 2. affirmat, ambos ab Imperatore accepisse Feuda Comitatus (f). Et verisimile est, id in antiquioribus scriptis invenisse Guisium, qui ante volumen tertium præfatus erat, se nihil in medium producturum, nisi quod ante eum auctores litteris mandassent. Deinde id quod num. 40 ex Anselmo Canonico Leodiensi retuli, Hermannum invitâ uxore cum Balduino icisse fœdus, evidenter indicat, etiam penes maritum potestatem fuisse. Scilicet Balduino se socium jungebat, ut Gotcheloni rebelli adversus Imperatorem auxiliaria præberet arma.

id quod testat
Guisius,

43. Consensum Imperatoris, ut Hermannò Richildis nuberet, probabilem quoque faciunt quæ post mortem viri accidisse, his verbis Meyerus scribit: *MLI de functo Hermannò Comite Montensi, Balduinus princeps statim post Pascha magnis viribus invasit Hanoniam, quâ subactâ, Castrî-Loci celebravit Balduini filii nuptias cum Richilde ejus terræ principe Hermannî viduâ Raginerii Montensium Comitissæ filiâ: hinc renatum cum Casare bellum, eò quod Hanonia Imperialis esset juris (t).*

de aliâ de his
verisimile.

(f) De Guise: *L'Abbaye & droit de l'Eglise de Montz & la justice de toute la Comte par l'Empereur aussi ilz receurent.*

(t) Andreas Monachus Aquicinctinus apud Continuatores Bouqueti, tomo XI, pag. 365: *Balduinus Comes Flandrensis Insulanus cum filio suo Balduino rebellat contra Imperatorem Henricum, invaso Montz Castrî-Loco: modus autem invasionis hic fuit; Hermannò Comite Montensi mortuo, Balduinus junior filius ejus Balduino uxorem duxit Richildem relictâ Hermannî Comitissæ, INCONSULTO IMPERATORE, & sic Hainonensem invasit Comitatum.*

F ij

Contrà verò ob conjugium Richildis & Hermanni neque exortum bellum, nec sinistri quidquam iis accessisse reperio. Quòd si prioribus his nuptiis annuerit Imperator, immò si ipse (uti vult Guilius) Hermannum Richildi dederit; in dubitationem adduci nequit, quin viro quoque Feudum tribuerit, ut nempe hominem fidelitatis vinculo obstrictum haberet sibi. Hoc posito, non sola uxor principatum gessit, nec sola communicavit potestatem. In hunc modum postquam effecisset Richildis, ut post funera Hermanni, Balduinus secundi tori filius ab Imperatore Feudum teneret; omnia gravioris momenti acta Balduino æquè ac matri tributa fuerunt. Gislebertus pag. 8 : *Comitissa cum Balduino filio in curiâ suâ officia hæreditaria instituit*. Henricus Imperator Feuda Hannoniensia Ecclesie Leodiensi subjiçiens, igitur, inquit, *præsente & annuente ipsâ Comitissâ Richilde cum filio suo Balduino, dedimus omnia hæc*. Gislebertus iterum pag. 9 : *Theoduinus Episcopus... allodia... ipsi Richeldi & ejus filio Balduino in feodo ligio tenenda concessit*. Sed quid necesse est multa his similia coacervare? nihil deinceps sine filio agit mater, nihil sine matre filius, priores partes tamen habente matre.

Respondetur
ad totam
Quæstionem.

44. Itaque ad propositam Quæstionem Respondeo. Uti per matrem Balduinus Comitatum Hannoniensem obtinuit, sic per uxorem Hermannus; & quemadmodum obtento Comitatu, rempublicam suo jure filius gessit cum matre, ita & suo jure Hermannus illam gessit cum uxore.



APPENDIX

*De profapiâ Hermannî Comitis Montensis,
ejusque in Hannoniâ possessionibus.*

I. **R**ESPONSUM meum, quod ita ut hæcenus repræsentatum est, arbitrio censuræque Illustrissimæ Academicæ obtuli, nonnemo ad illustrandam Historiam Belgicam accomodatius futurum fuisse judicavit, si plus diligentiae adhibuissem, ut Hermannî Comitis profapiam in apricum proferrem. Quamquam enim præfati Comitis genus & proavos novisse non adeo interfit ad Quæsitum Academicum, modò de hereditariâ Comitissæ uxoris successione convicta mens sit; tamen & sententiam meam corroboraret, & historiæ Belgicæ studiosum oblectaret notitia certa familiæ ex qua oriundus sit Comes noster, ne tamquam terræ, ut aiunt, filius perpetuam posteritati suæ labem apud animum nostrum inurat. Fateor ingenuè, penes me non esse, ut intricatum nodum dissolvam: duo tamen contra nonnullorum opinionem non vereor asserere; eum neque è Balduino Comite Flandriæ, quem à *pulchrâ Barbâ* cognominaverunt, traxisse genus, neque umquam fuisse advocatum seu patronum monasterii Alti-Montensis siti in *Pago Hainou*, constructique à S. Vincentio, uti narrat Baldericus (a).

Hermannus
Montensis
non fuit ne-
que Hainou
si IV.

2. Ut è familia Balduini Flandrensis crederetur Hermannus, argumentum aliquod præbuit auctor anonymus Operis, quod sub nomine *Flandriæ Generosa*

non fuit co-
gensus pa-
truelia Bal-
duini Mon-
tensis:

(a) Chronic. Camerac. & Atrebat. lib. 3, cap. 6.

doctissimus vir D. Paquot notis illustratum anno 1781 edidit, ubi pag. 16 hæc verba legere licet: *Balduinus de Richilde duos filios Arnulphum & Balduinum genuit. . . . A Domino tamen Lietberto Cameracensi & Atrebatensi Episcopo cum Richilde suâ excommunicatus est, eò quòd per incestum adulterio pejorem cognati sui Hermannii Comitis uxorem duxisset, &c.* Si ergo, inquit aliqui, Hermannus Montensis & Balduinus tam propinquè cognati essent, ut propterea conjugium Balduini cum viduâ Hermannii pronunciaretur incestus adulterio pejor; oportet, ut maximè propriè cognati essent, puta, patruelus seu fratris & sororis filii. Accedit quòd Georgius Fabricius (b) recensens Duces Bavarie è gente Saxonica, postquam egisset de Brunone II Marchione Saxonie, florente ætate anno 998 fatis functo hæc habeat: *Ludolphus Brunonis II unici filius Princeps & suâ & filiorum virtute celeberrimus, frater uterinus Henrici III Imperatoris. Uxor ejus Hilda, Balduini II Flandrie Comitis filia: ex qua procreavit Brunonem Marchionem Saxonie, HERMANNUM Saxonie Palatinum, Othonem Ducem Saxonie ad Visurgim, Ecbertum Marchionem Misnie & Turingie.* Quæ si combinaveris, videbitur Hermannus Saxonie Palatinus idem esse, qui Hermannus Montensis, Balduini cognatus: adde Richildis Comitissæ conjugem sic non malè à Guisio dici oriundum è domo Thuringicâ, cujus nempe frater Ecbertus in laudatis verbis Fabricii *Marchio Thuringie* fuisse perhibetur.

alioquin e-
nim Her-
mannus Ri-
childen

3. Speciosa hæc magis quàm solida aut vera argumenta sunt. In primis Georgius Fabricius Hildam filiam esse statuit Balduini II, scilicet cognomento Calvi anno 918 defuncti; cujus proin filia nequit esse mater Hermannii Montensis, nisi Hilda provectif-

(b) Georgius Fabricius, Saxonie illustrata, pag. 335.

simâ ætate, certè sexagenariâ major Hermannum peperit. Hoc etiam admisso, jam Hermannus filius Hildæ & Balduinus Montensis secundo & sexto gradu mixto consanguinei forent. Cur ergo propter istam tam remotam affinitatem cum Richilde Balduinus separatus ab ecclesiâ fuisset, cui aliunde cum eadem erat propinquus, uti ostendi in Schemate pag. 14. Ponamus tamen liberaliter, à Georgio Fabricio Balduinum II exaratum pro Balduino IV, id est pro Balduino *Barbato*: tum quidem Hermannus & Balduinus Montensis secundo gradu, secundum ecclesiasticum loquendi modum, erunt propinqui, prout apparebit in subiecto Schemate (c), sed donec è probatis monumentis ostendatur, rem ita se habuisse, dicam Hermannum Ludolphi filium esse alium ab Hermanno Montensi.

4. Si enim Hermannus ex Hilda nepos sit Balduini IV; numquam Richildem duxisset, vel certè ejus matrimonio obfuisent leges ecclesiasticæ; nec prætermisissent Episcopi arguere criminis Hermannum, quòd Richildi sibi propinque & consanguineæ conjungeretur. Duxerat Raginerus V filiam Herimanni Einhamensis, qui Herimannus filius fuit Godefridi Virdunensis & Einhamensis Comitis, matrimonio

utpote consanguineam contra leges duxisset.

(c)

BALDUINUS IV

Comes Flandriæ.

HILDA
uxor Ludolphi.

BALDUINUS Infans
duxit Aelam.


HERMANNUS.

BALDUINUS
Montensis.

juncti cum Mathilde viduâ Balduini III, quartâ matre seu tritaviâ Balduini Montensis. Ergo Hermannus Montensis nactus communem cum Richilde originem Mathildem, fuisset cum uxore suâ tertio & quarto mixto gradu consanguinitatis propinquus. Atqui tamen nusquam legimus, Episcopos nuptiis sese opposuisse, quorum sollicitudinem, ne sanguine juncti etiam toro sociarentur, non semel jam exhibui. Proinde numquam inducar ut credam, nepotem cum fuisse Balduini IV, nisi proferantur testimonia, quibus repugnare temerarium foret. Genealogiam illam magna ex parte probavi supra in responso: partem reliquam tradit auctor Flandriæ generosæ cap. 7 & 8 his verbis: *Balduinus Juvenis* (seu III) *duxit Mathildem filiam Herimanni Ducis Saxonum, de qua genuit Arnulphum Juniorem... Mathildis verò post obitum mariti sui nupsit Godefrido Duci de Einham, ex quo suscepit tres filios, scilicet Gocelonem Ducem & Godefridum & Hecelonem. Arnulphus Junior... genuit... Balduinum (ejus nominis IV) pulchrâ barbâ &c.* Res clarior fiet in subjuncto stemmate (d), cui etiam Hildam

(d)

MATHILDIS



Hildam inferui, non ex meâ, sed aliorum sententiâ.

5. Auctorem anonymum, qui *Flandriam* Locus obiectus ex Flandriâ generatâ vel mendosus est, *genero- sam* litteris mandavit, non arbitror rejiciendum: at non indicat is, quantâ propinquitate cognati essent Herimannus Comes & Balduinus Montensis: neque enim vocabulum *Cognatus* unâ tantum certamque vim significandi apud auctores consecuta est, uti satis apparet in Glossario Domini Du Cange, sed pro quibusvis consanguineis usurpatur. Immo persuasum mihi habeo, non de Montensi sed de Einhamensi sermonem illic fieri, id quod jam pridem observavit Galopinus in notis operi subjectis, pag. 17, nequaquam hæc de causâ à Paquotio, prout alibi assolet, reprehensus. Et ne diutius rem protraham, dico in textu, qualis nunc exstat, vocem unam ornissam, atque ita complendum sensum: *eò quòd cognati sui Herimanni (Einhamensis) NEPTEM uxorem duxisset.*

6. Certè Herimannus Einhamensis cognatus erat Balduini Montensis, eodem sanguine genitus, frater uterinus Arnulphi II; Arnulphus autem abavus Balduini Montensis, uti jam mox ostendi. At ne quis opinetur, me pro libitu vulgatam lectionem emendasse; illud adjungo, vel de Herimanno Einhamensi intelligendum auctorem, vel eum scriptoribus sibi æqualibus antiquioribusque contradixisse omnibus, novamque procudisse notionem historicam, quæ reliquas historias pessumdet; si nempe docuerit Hermannum & Balduinum Comitissæ Hannoniensis ex ordine conjugis cognatos fuisse & patruces seu sororis & fratris filios. Argumentum huic opinioni jam à me oppositum ex eo quòd sic quoque consanguinei fuissent Hermannus & Richildis, non repetam, sed missum facio; cum aliunde non minùs valide oppugnetur efficta illa cognatio.

vel auctor
sibi & aliis
reputat

tradentibus,
Hannoniam
h. Flandro
subactam per
nuptias Bal-
duini, nec
sine ulla.

7. Si Hermannus Montensis nepos fuerit Balduini IV, consequitur, ut aberraverint omnes suprà laudati, aliique ejusdem sententiæ auctores, qui tradiderunt, Balduinum VI ambivisse nuptias cum Richilde eo fine, ut Hannonia & Flandria in unum cogeretur dominium: consequens etiam fit, ut aberraverit ipse auctor *Flandriæ Generosæ* dicens cap. 16: *Balduinus uxorem duxit Richildem Comitissam Haynoënsē, ut illum etiam Comitatum per eam haberet*: item qui tradiderunt, Imperatorem descendisse in Belgium, ut ab invadendâ Hannoniâ arceret Balduinum. Cur Richildem Flander bello petiit, aut cur in Flandrum invasorem copias duxit Imperator, si jam tum in Balduinorum familiam reducta erat Hannonia? Tantine intererat Balduini Insulani, amovere ab Hannoniâ sororis suæ Hildæ nepotem, ut propterea iram Imperatoris in se provocare voluerit? Adde, quòd imprudentiæ arguendus Imperator sit, qui Hermannum ex maternâ origine Flandrum Richildi junxerit, evidenti periculo, ne Hannonienses cum Flandris sociarent vires. Hæc & hujus generis alia, uti improbabilem faciunt Hermannii cum Balduino cognitionem, sic simul evincunt, genuinam non esse lectionem *Flandriæ Generosæ*. Sed hæc hætenus: procedo ad abbatiam Alti-Montis, quam nonnulli opinantur Hermannio Montensi Comiti concessam fuisse in beneficium; ex quo efficeretur, eum vel in Hannoniâ Comitem fuisse, vel certè non pauca possedisse in eâ provinciâ, antequam Richildi Comitissæ jungeretur matrimonio.

Monasterium
Alti-Mon-
tis in Han-
noniâ non
Hermannum
Hannoënsē;

8. Totam rei historiam habemus ex Balderico Cameracensi chronographo, lib. 3, cap. 6 hæc scribente. *Est monasterium in pago Hainou, in villâ quæ dicitur Altus-Mons, quod Comitibus in beneficium tra-*

ditum est, & ad tantum casum paulatim devolvitur, ut monachis quidem egestate coactis, paucorum clericorum custodiæ mandaretur. Procedente verò tempore, contigit Arnulfo, patri Domni Episcopi, à Comite Herimanno in beneficio compensari, &c. Quæstionis cardo in evertitur, an hic Herimannus non sit alius ab Hannoniensi Comite, conjuge Richildis? In primis *Domnus Episcopus*, de quo loquitur Baldericus, est Gerardus de Florinis, Episcopus Cameracensium. Hujus pater Arnulfus, qui non exiguo tempore abbatiam tenuit, obiit eodem anno quo filius consecratus est Episcopus, adeoque anno Domini 1013 (e). Igitur jam dudum ante annum hunc Hermannus Hannoniensis Comes (si de eo sermo esset) abbatiae advocatum constituit Arnulfum, dudumque antè, quàm Raginerus V matrimonium iniverit. Oportet igitur ut homini senì nupserit Richildis, & qui vel natu major vel saltem diutius Comes fuerit quàm Raginerus Comitissæ parens. Præterea hoc etiam, utcumque incredibile sit, admissio & concessio, jam evertitur sententia illorum, quibus Hermannus Montensis est filius Hildæ, nepos Balduini IV: hic enim non nisi anno 989 Comitatum Flandriæ obtinuit, teneræ admodum ætatis, ac proin anno 1013 non potuit habere nepotem jam pridem Comitem, atque eà ætate virum, ut possessiones suas liberè abdicaret.

9. Quis itaque ille est Herimannus, à quo Monasterium Alti-Montis in beneficium Arnulfo concessum fuisse, scribit Baldericus? Respondeo, eundem esse Herimannum, de quo paullo antè Baldericus egerat nempe lib. 3, cap. 5; alioquin illa capita ineptissimè conjunxisset auctor, & sine ulla

sed Herimannum Alti-Montensem aliquando præstemonium habuit.

(e) Ita Auctores Gallie Christianæ auct. tomo 3, col. 19.

ratione de Alto-Monte ibidem sermonem intulisset : item eundem esse Herimannum , de quo mox cap. 9 chronographus mentionem facit, scilicet Herimannum fratrem Ducis Godefridi, Herimannum Einhamensem, qui adversus Lambertum Comitem Lovaniensem & Raginerum V Comitem Hannoniensem gesto bello, tandem *ad integrandam amicitiam*, filiam suam Raginero V uxorem dedit, matrem aliquando futuram Comitissæ Richildis. Legenti locis citatis Baldericum vel sola connexio rerum persuadebit, non de Montensi, sed de Einhamensi Herimanno avo materno Richildis omnia intelligenda esse.

Abbatie
non semper
commendan-
tibus Co-
mitibus.

10. Forſitan dubitabit quispiam, quomodo Ardenſis & Einhamenſis Herimannus monaſterii Alti-Montenſis in Hannonia ſiti advocatus ſeu patronus fieri potuerit: at mirari deſinet, ſi in memoriam revocet, Godefridum Ardenneſem Hannoniæ Comitem aliquando fuiſſe, quin & Lotharingæ Ducem. Præterea non ſemper provinciæ Comitibus commendabantur monaſteria; nam auctores Galliæ Chriſtiænæ auctæ, tomo 3, col. 115 referunt, Ratherum Laubienſem monachum, qui Episcopus Veronenſis, poſtea Leodiienſis, iterumque Veronenſis fuit, plures abbatias ad victum & cultum impetrâſſe, Amandinam, Alnenſem, *Alti-montenſem* &c., quem obiſſe ſtatuunt anno 974, antequam Herimannus Comes (malè illi Hannonienſem vocant) abbatiam hanc Arnulfo de Florinis in *beneficio compenſavit*. Atque hæc ſunt, quæ de proſapia & poſſeſſionibus Hermanni Montenſis mihi diſcutienda oblata fuerunt, quæ æqui bonique conſular Lector, utpote neminis carpendi ſtudio, ſed indagandæ veritatis ergo diſputata.

FINIS.

231.30

2

99 95 126



